

قالمد گدی

# ظلمت منیگو

خال محمد بیگ اوغلی



## الهی!

الهی! ای تعالی الله! ایشانچیم سېنگه کامل دیر،  
سناقسیز رحمتینگ دایم مېنینگ حالیم گه شامل دیر.  
اۋزینگ سن قادر مُطلق، اۋزینگ سن خالق برحق،  
صمد سېن سن، احد سېن سن، هوشی بار سېنگه قایل دیر.  
کریم سېن سن، رؤف سېن سن، عزیز و مُقتدر سېن سن،  
بوتون مخلوقلرینگ اۋزینگنی تابوغینگه سایل دیر.  
سېنینگ قادرلیگینگه هرکیشی که مُعترف اېرمس،  
نی عاقل دیر، نی عالم دیر، توشونمس - سوچّه جاهل دیر.  
هدایت ایله گین اۋزینگ صراط المستقیمینگه،  
وگرنه، بو یمان نفسیم، یمان یؤللرگه مایل دیر.  
سېنینگ بویروغلرینگ نی قیلمه یین یوردیم عبث بیرله،  
منه شونده ی عزیز عُمریم عبث ایشلرگه زایل دیر.  
خطرلی - قلتیس ایشلردن اۋزینگ قیترگین، ای ربیم!  
هنوزهم بو سیدیرغه دل، خطرلی ایش گه امل دیر.  
جمعه بازار - ۵ شنبه - ۲ - حمل - ۱۳۹۷

## الله مهربانيم!

الله مهــــــــــــربانيم! مېن انچه سېنى سېوگوم.

اي منبوع ايمانيم، مېن انچه سېنى سېوگوم.

سېن سن رحيم و رحمان، سېن سن كريم و سبحان،

اي خالق جهانيم، مېن انچه سېنى سېوگوم.

سېن سن حقيقى معبود، سېن سن هميشه موجود،

بۇلسين فدا بو جانيم، مېن انچه سېنى سېوگوم.

چين دن سېنى سېور من، يۇلينگده جان بېرر من،

گوده م ده بار توانيم، مېن انچه سېنى سېوگوم.

مېن ايله ديم خطالر، سېن ايله دينگ وفالر،

اي رحمي بحر و كانيم، مېن انچه سېنى سېوگوم.

سېن دن اميديم اوزمم هېچ وقتده اي الهيم،

يورسه رگيم گه قانيم، مېن انچه سېنى سېوگوم.

شنبه اپرته ۲۰ ميزان / ۱۳۹۸ / ميمنه

## قرآن

دواسیز دردلرینگه دارو - درمانینگ ابرور قرآن.  
 بلا- آفت گه قرشى یخشى قلقانینگ ابرور قرآن.  
 شیاطین شریدن آسروچی قۇرغانینگ ابرور قرآن.  
 یقیلمس بیر سوینچیغ هم نغهبانینگ ابرور قرآن.  
 اوزیلمس «عُرُوتِ الْوُتْقَى» و ارقانینگ ابرور قرآن.  
 کلامِ خالق و رزاق و رحمانینگ ابرور قرآن.

كېل اي انگلى كيشى آلگين اۋنوملر اوشبو قرآندن،  
 شقاوت دن اوزاقلب اۋرگه تر الطاف و احساندن.  
 نواهى دن كېچيب واز، بوپروغىنى ايله سنگ جانندن،  
 قوتولتورگه ی سېنى تورلى بلالر بېرله شىطانندن.  
 تىنىنگه جان و كوچ بار بهره لنگين اوشبو امكاندن.  
 مكرر ايتە من اپنگ یخشى امكانینگ ابرور قرآن.

كۈزىنگ آچ، تورگين اپندى غفلت اويقوسيدن اي عاقل!  
 يامانلىك دن اۋگير يوز، يخشىلىككە دل نى اېت مایل.  
 بېلیم اۋقىب عمل قیل، هېچ زمان ده بۇلمه گین كاهل.  
 عزیز عمرینگ نى هرگز قیلمه گین غفلت بيله زايل.  
 ینه قرآن پاك نینگ بوپروغى دن بۇلمه گین غافل.

اگر ايسته يسن عزت، عزت و شانينگ ابرور قرآن.

جهالت يۇللىرى گە باسمە گين آديم دوامت هم.

معظم ابلچيميز بيروغى گە قيل استقامت هم.

كوچينگ بۇلگنده قيلگين كمبغللرنى اعانت هم.

آيب قرآننى قۇلگە ايله كۇنگيل دن تلاوت هم.

اوشنده قيلگوسى «الله» عبادت نى اجابت هم.

اولوغ تېنگرى تماندن لطف و احسانينگ ابرور قرآن.

كېلىب الله پاكينگ تابوغى گە خمله باشينگنى،

جهالت هم ضلالت يۇلى گە اۈتكزمە ياشينگنى،

اۈلپمىنى اېس گە آيب همده جارى ايله ياشينگنى،

حرام گە بولغمە هرگز ايچمىلىك بيرله آشينگنى.

حلال و يخشى يۇل دن قۇلگە كېلتيرگين معاشينگنى.

سېنى «فوز العظيم» گە دعوت اېتگانينگ ابرور قرآن.

جمعه بازار / جمعه / ۳ / حمل / ۱۳۹۷

## نعت

یورور من آرزو بیرله که بیر کورسم جمالیزنی،  
 کوریب طوف ایله سم هر دم قد نوچه نهالیزنی.  
 غم و قیغو و حسرتدن مېنینگ کونگلیم تؤولیب تاشتی،  
 المدن صاف ایتیب کونگلیم، نصیب ایله ننگ وصالیزنی.  
 توشیمگه بیر کیرینگ یامصطفی! یا سید عالم!  
 مېنگه لطف ایله بان کورینگ یوزین اول ذوالجلالیزنی.  
 غم امت بیلن دایم ابدیز قیغو و حسرتگه،  
 کیشی سیز دېک بۇلالمس دور بو کورستگه ی کمالیزنی.  
 ابرور سیز رحمت عالمگه سیز ای محبوب خلاقیم!  
 تنی کورگن اېمس، کورمس جهان سیزنینگ مثالیزنی.  
 شب معراج گه کپتگانینگیزه عالمنی سرداری،  
 ملکلر بۇلدیلر حیران کوریب سیزنینگ هلالیزنی.  
 دعا قیل آل و اصحابیگه هم سبن اېندی بیگ اوغلی،  
 قیلیب ایستک دېگیل هر دم که بیر کورسم جمالیزنی.  
 ۳شنبه - ۲ - سنبله - ۱۳۹۰

## رحمت للعالمين

اې، جهان هېچ كۆرمه گن سيز دېك بويوك بير رهبرى،  
انس و جن يعنى بوتون عالم - خـــــــــــــــــلايق سرورى.  
انبيا و اولياء نينگ باشليغى - تاج ســـــــــــــــــرى.  
رحمت للعـــــــــــــــــالمين آخر زمان پيغمبرى.

سيزدن آلدين اېردى عالم كفر و شر ككه مبتلا.  
كونده هريان دن ياغردى اېل - اولوس گه يوز بلا.  
سيز كېلىب عالم نى قىلدين گيز فلاكت دن جدا.  
رحمت للعـــــــــــــــــالمين آخر زمان پيغمبرى.

كوچگن اېردى اېل - اولوس دن يخشيلغ - يخشى مزاج.  
بیر- بيراو يۇلى ده چـــــــــــــــــاه قازيش اېدى رسم و رواج.  
شونده بين قارانغوليكلرده كېلىب بۇلديز ســـــــــــــــــراج.  
رحمت للعـــــــــــــــــالمين آخر زمان پيغمبرى.

خاتين و قىزلرده اصلا قدر و قيمت يۇق اېدى.  
هم غريب - بېچاره لرده لطف و شفقت يۇق اېدى.  
بیر خىلى آچلىكدن اۇلىب، بیر خىلى هم تۇق اېدى.  
رحمت للعـــــــــــــــــالمين آخر زمان پيغمبرى.

یوزلری آدمنى تورخسى، دللری شیطان ابدى.

كېچه - كوندوز ایشلری فسق و فجور- عصیان ابدى.

ناجى بۇلیب كېلدىنگیز سیز رحمت رحمان ابدى.

رحمت للعالمین آخر زمان پیغمبرى.

جان فدای خُلقینگیز، وه خُلقینگیز قنچه عظیم.

یولینگیزنى اُسوه دهب ایتگن خداوند کړیم.

اُوزینگیز سیز برچه مؤمن گه رُوف و هم رحیم.

رحمت للعالمین آخر زمان پیغمبرى.

كېچه - كوندوز تینمه بین امت اوچون غم یوتدینگیز.

مهربان آته - آنه دن بیزگه سیز دیر سیز عسیز.

جانیمیز بۇلسىمین فدا یولیز گه ای سرداریمیز!

رحمت للعالمین آخر زمان پیغمبرى.

آل و هم اصحابینگیزنى رحمت ایتسین کردگار.

دین یولی ده چېکدیلر زحمت اولرهم بی شمار.

یاولرینگیز کۆزى ده بولسین مدام گرد و غبار.

رحمت للعالمین آخر زمان پیغمبرى.

گرچه مین هم سیزگه امت من دېدیم لاف اوردیم آه.

لبکن امتلیک یۇلى دن آیره من هم روسیاه.

تابوغیزدن قووله منگ بو عاصی نی ای عالیجاه!  
رحمت للعالمین آخر زمان پیغمبری.

اېرته محشر روزی ده ایله ننگ شفاعت بیزگه هم.  
بېلیمیزی بوکمه سین آه و ندامت همده غم.  
لطف ایتیب امت دېینگ، بیزلرگه باقیب ذوالکرم.  
رحمت للعالمین آخر زمان پیغمبری.  
شنبه کیچه - ۵ - حمل - ۱۳۹۶ . جمعه بازار

## كىم گە ايتەي؟

يورەك تۇلدى المەن، كىم گە ايتەي؟

بېلىم سىندى ستمەن، كىم گە ايتەي؟

رېجە ألسم يېتالمم اىستەگىم گە،

بلا توتگن يقمەن، كىم گە ايتەي؟

دەيمدە كۇندەلنگ دەر كتە تۇسۇق،

نېچوك اۇتسم بو كەمەن، كىم گە ايتەي؟

ايشانچىم تۇلە، مېنگە قىلدى خۇدە،

ينە الداق و چەمەن، كىم گە ايتەي؟

وفا كوتدەيم، جفا كۇردەيم، درىغا!

بو اينىقسە رقىمەن، كىم گە ايتەي؟

بو آچون دە يشمەم هم قىتغ اۇلدى،

بو قىغۇ، رنج و غمەن، كىم گە ايتەي؟

جمعه ۴/حوت/۱۳۹۶/جمعه بازار

## سياست اۋتى دە كۈيگن ابل

سېن، سياست اۋتى دە بۇلدينگ اۋتون، مظلوم اېلىم!

كۈيدى بارينگ گور - گورەب، چىقىدى توتون، مظلوم اېلىم!

يوز بۇلدينگ، بلکہ مينگلر پرچەدن ھم انچە كۈپ،

بۇلمەدينگ ھېچ بىر قچان سېن بىر بوتون، مظلوم اېلىم!

مونچە ھم بۇلسىنىمى خاملىك؟ مونچە زۇملىك - اۋقېلىك؟

اوشبو زۇملىك - اۋقېلىك دن، قلىبى خون، مظلوم اېلىم!

وا اَسَف! اۋزىنگى تانىب بېرمەدينگ بىر - بىرگە قۇل،

شوم چىزىق چىزىدىگ يۇلىنگگە تون وكون، مظلوم اېلىم!

سېن، نېگە اويغانمەدينگ و ھمدە بىرلىك توزمەدينگ؟

كۈرمەدينگ اوشبو سبب ھرگز سكون، مظلوم اېلىم!

باشقەرلر اويغاندى - پىشتى، اَلدى مَوقِف - اۋرنىنى،

شاشىلىب اۋز قۇلى دن بېرگن اۋرون، مظلوم اېلىم!

تا قچان ياو دھلى گە رقاصە سن؟ بېرگىن جواب!

ياكە ياولر قىلدىمى سېنى فُسون، مظلوم اېلىم!؟

اىستەسنگ سېن ھم يوتوقنى، اېندى «چقان بۇل مدام»

قىسقە ايتىدىم بۇلمەسېن دېب سۇز اوزون، مظلوم اېلىم!

۴ شنبە كېچە / ۹ / حوت / ۱۳۹۶ / مېمنە

### قىلمە مونچە اشتراپ

مېن سلام بېردىم اونگە، قۇيدى سلامىم لاجواب،

قىلمىشى دن اۋپكە - بغيريم بۇلدى آخر هم كباب.

ھجرى دن باشىم گە قۇملر ساوورور من دمبدم،

كېلمەگە ي بېر گل سۈرەب بو خستە حالېم آفتاب.

بېر تمان دن قىينەگە ي او، بېر تمان دن اېل سۇكر،

بېر تمان دن قىغو باققە ي، بېر تمان دن هم عذاب.

وا عجب! بېر دردگە بۇلدىم مبتلا مېن، واعجب!

بۇلمەسىن بوندە ي الم گە مبتلا ھېچ شېخ و شاب.

لطف اېتىب اې تانگ يېلى! بارگيل، بيان اېت حالتېم،

بېر كېلىب كۇرسىن مېنى، تېنگرىم بېرەر اونگە ثواب.

اې بېگاۋغلى! تېنگرى توزگە ي ايش نى تشوېش اېتمەگيل،

بۇل تحمللى بېر از و قىلمە مونچە اشــــتراپ.

۱ شنبە كېچە / ۱۳ / حوت / ۱۳۹۶ / مېمنە

## ساغیندیم کو مېن

اېسكى كېزچاغلرنى، ساغیندیم کو مېن،

دۈست و اۋرتاغلرنى ساغیندیم کو مېن.

تۈغرى دن يارليککه هم ارزىيدىگن،

دللى ساغلرنى، ساغیندیم کو مېن.

يوزلرين كۈرسم تينر اېردى يوره ك،

نقره بلداغلرنى، ساغیندیم کو مېن.

يازوویم اوستى گه خط چيزگه ی اېدى،

مېن، او چلپاغلرنى، ساغیندیم کو مېن.

باغ و چرباغلرگه يورگه ی ديك كېزيب،

باغ و چرباغلرنى، ساغیندیم کو مېن.

تورلى گلر بيرله كۈمكۈك يشنه گن،

سای و قير - تاغلرنى، ساغیندیم کو مېن.

يور تيميزنى كۈركم اېتگن فيضى دن،

دریا - قيرغاغلرنى، ساغیندیم کو مېن.

دین اوچون، اۈلكه اوچون، ملت اوچون،

سینه سی داغلرنی، ساغیندیم کو مېن.

تندور ایچده گگی کیسیرداغ نان ایله،

دېگی قیسماغلرنی، ساغیندیم کو مېن.

یرمه و یتالی شـۇربا، آش پلو،

هم قاوورداغلرنی، ساغیندیم کو مېن.

آنه جان توزگن سوت و قاتیق بیله،

مَسکه - قَیماغلرنی، ساغیندیم کو مېن.

کیم گه ایتە ی مېن یوره ک نینگ دردینی؟

(یار و اورتاغلرنی، ساغیندیم کو مېن)

۲ شنبه تون/۹/دلو/۱۳۹۶ میمنه

## مېن يمان نى قوولە مە!

اي خداییم! تابوغینگدن، مېن يمان نى قوولە مە!

معصیت باغشى دن تورخى سمان نى قوولە مە!

نفس و شيطان سۈزيگە كىردیم، فريب يېب حيف! حيف!

نفس و شيطان نینگ قولى دن كۈنگلى قان نى قوولە مە!

بو پروغینگگە بۈينیم اېگمە ي خيزلەدیم طغیان قىلیب،

جرم و عصیان بارى دن بېلى كمان نى قوولە مە!

كېچە - كوندوز، آی و يیل بۇلدى گناهگە باتدیم و،

بې گناه اۋتكزمەگن هېچ بىر زمان نى، قوولە مە!

قنچە قاچسېم، قنچە قووسنگ، قیتە دن كېلدىم ينه،

درگھینگدن سۈرەبان كېلگن امان نى قوولە مە!

يخشى يۈلگە كېتمەدیم، بۇلسە ميسر گنده يۈل،

تۇغرى يۈل دن يوز اۋگىرگن قَلتبان نى قوولە مە!

قیتە - قیتە تابوغینگگە التجاء قىلدىم كېلیب،

مېن يمان نى، مېن يمان نى، مېن يمان نى قوولە مە!

جمعه / ۲۷ / دلو / ۱۳۹۶ / جمعه بازار

## خداوندا!

خداوندا! كېچير مېنى، عَجايِب بېر يمان قول من،

گناه و معصيت نېنگ يوكى دن بېلى كمان قول من.

سېنىنگ بو يروغلىرىنگه قـؤيمه يېن باش ايله ديم طغيان،

حقيقت يولى دن شـيطان چيقرگن كؤنگلى قان قول من.

اگر چدى كه، مېن دېك گنده دن گنده قولېنگ بؤلمس،

ولى، شو حال ده هم سېن دن سؤره ب كېلگن امان، قول من.

اؤزېنگ قوتقرگين اې رېيم! لعين نفـس و شياطين دن،

لعين نفـس و شياطين قولى دن رنگى سمان قول من.

اؤلېم، قبر و كـتاب همده حساب اېسېم گه كېلمه يدى،

عـبث - بېهوده ايشلر كېنى دن بـؤلگن روان قول من.

سيغىنمه ي سېنگه چـين كؤنگيل بيله، دايم يمان ايلب،

كبتيرگن تابـوغينگه بـو قـرا يوز ارمغان قول من.

حـضورېنگه مۇقر من، كېچگين اؤزېنگ اېندى جرمېم دن،

يمان قـول من، يمان قـول من، يمان قـول من، يمان قـول من.

۱ شنبه كېچه. ۱۲. قوس. ۱۳۹۶. مېمنه

## تور اېندى

سپوئىلى جانەجان خلقىم! كۈتر باشىنگ نى، تور اېندى!

غەمىنگەدن قاتدى بو خلقىم، كۈتر باشىنگ نى، تور اېندى!

قۇلاق ياو سۈزىگە سالدىنگ، نفاق توزاقىدە قالدىنگ،

دېگىن! نې فایدەنى آلدىنگ؟ كۈتر باشىنگ نى، تور اېندى!

بېلىنگىنى باغلهگىن اېندى، خداگە يىغلهگىن اېندى،

اۋزىنگ نى سقلهگىن اېندى، كۈتر باشىنگ نى، تور اېندى!

نفاقە بولغەنىب ياتمە، جەھالت تـوزلرین تاتمە،

اۋزىنگ اۋزىنگگە اۋق آتمە، كۈتر باشىنگ نى، تور اېندى!

محبت بىرلە قۇلىنگ توت، اۋزىنگ اۋزىنگنى قىغونگ يوت،

كـدورتدن يورەك ساووت، كۈتر باشىنگ نى، تور اېندى!

اېگەتور آنە يـورتىنگگە، قووانچ قور آنە يورتىنگگە،

يشە خـر آنە يورتىنگگە، كۈتر باشىنگ نى، تور اېندى!

نفاقە بېرمەگىن فرصت، توزىب تور بىرلىك و وحدت،

شو بىرلىك اۋزى دىر رحمت، كۈتر باشىنگ نى، تور اېندى!

۳ شنبه . ۹ . عقرب . ۱۳۹۶ . ميمنه

## اسلام دینیمیز

ناتوان تنلرگه قوت بېردى اسلام دینیمیز،

سۈلیگن دللرگه خُصرت بېردى اسلام دینیمیز.

تېنگریمیزنى تانیتیب قوتقردى کفر و شرکدن،

بیزگه شان و همده شوکت بېردى اسلام دینیمیز.

لطف و شفقت خلق اراسى دن بوتون بیتگن اېدى،

کۈنگلى قاتگن لرگه شفقت بېردى اسلام دینیمیز.

سېن، بو قرآن دېک گۈزهل نعمتنى قه ی دن تاپه سن؟

شکرلله کتّه نعمت بېردى اسلام دینیمیز.

اول محمد ص "کیم اېرورلر اېلچیلر باشى گه تاج،

بیزگه شوندېک تاج و دولت بېردى اسلام دینیمیز.

باردى مینگ ییل هم تیریکمیز، شکرى دن بیزلرضعیف،

چون، سناقسیز لطف و رحمت بېردى اسلام دینیمیز.

مال و دولت مېنده یۇق دېب یوتمه قیغو - غمى هېچ،

سېنگه ایمان کتّه نعمت، بېردى اسلام دینیمیز.

شنبه ۹۵ - ۶ - ۶ - میمنه

## خطا کیم دن؟

قالیب دور یورگی مېن دن، خطا اوندن می؟ مېندن می؟

دېگه ی دیر سېنى سېومه یمن، خطا اوندن می؟ مېندن می؟

غریبى گه قهره ب قئۇیمس، یوره گى ذره چه کؤیمس،

مېنى قیینش دن او تئۇیمس؟ خطا اوندن می؟ مېندن می؟

کیب یاشیل، سربغ، گلگون، قیلر جور و جفا هرکون،

او لیلی، مېن غریب - مجنون، خطا اوندن می؟ مېندن می؟

او خوشلیقه باتیب قالگن، گل آستی ده یاتیب قالگن،

غریبین غم آتیب قالگن، خطا اوندن می؟ مېندن می؟

غریبى ناله لر ایلر، کؤزى دن زاله لر تیلر،

غم اوقى جسمینی پیلر، خطا اوندن می؟ مېندن می؟

اونى سېودیم دلیم بیرله، هوش و آنگ و بیلیم بیرله،

دلیم بیرله تیلیم بیرله، خطا اوندن می؟ مېندن می؟

غریب رنگى سربغ سؤلسه، قضا تؤولیب اگر اولسه،

جفانینگ کاسه سی تؤولسه، خطا اوندن می؟ مېندن می؟

۵شنبه - ۱۱ - سنبله ۹۵ - میمنه

## تۇلىن آيىم!

غربىنىڭ گە قىرە، اې تۇلىن آيىم!

يمان حالين سۇرە، اې تۇلىن آيىم!

كېچە - كوندوز فراقىنىڭ گە كۇيىيان،

يۈرەك بغيريم يىرە، اې تۇلىن آيىم!

تلطف كۇرمەدېم سېن بغيرى تاشدن،

جفانگ لىك، ورسرە، اې تۇلىن آيىم!

باشىم اېگىلتىرىپ آيتدېم مۇكەرر،

(مدە آزار مۇرە) اې تۇلىن آيىم!

سېنىڭ قىلگن ايشىنىڭ دن مېن يوتىب غم،

قالىب مۇن مېن غۇرە، اې تۇلىن آيىم!

۴شنبە ۲- قوس ۱۳۹۵ - مېمئە

قربان ھىيتى

ابلىمىزگە كېلدى قۇربان ھىيتى فرحت بىلە،

يگە بىر فرحت اېمىس دىر، شفقت و رحمت بىلە.

تىنچ و خندان كۆرىنەرلر قىرى - ياش و بالەلر،

قىغونى باش دن اوچىردى كلفت و محنت بىلە.

مال و دولت اېگەسى قشاق نىنگ اېلگى دن توتىنگ،

ھم يېتىم - بېچارە نىنگ باشىن سىلەنگ شفقت بىلە.

بىر - بىرىنگىزگە ايشانىب اوشىبو فرصتلر سبب،

كۆنگىلىنگىز دن خالى ايلەنگ كىنەنى كۇدرت بىلە.

بو بوزوغ يورتنى، عزیزلر جان و دل دن بىرلەشىپ،

يخشىلىب آباد اېتىنگلر قونوت ايلە زحمت بىلە.

گر مسلمانلىككە بۇلسىنگ چىن يورەك دن مدعى!

تېنگرى امرىنى بىجرگىن ھىمدە آنحضرت بىلە.

گر خدا نىنگ ائىدىدە بۇلمەي دېسىنگ زار و خجل،

قىلمەگىن اعمال فحشاء - غىيبت و تھمت بىلە.

ياش اولوغ لرا! ياش كىچىكلرگە بۇلىنگلر مەربان،

باردى يو عۆز كوتر سىز كېلەجك حرمت بىلە.

ھىرنە قىلگەي سىز قىلىنگلر خالصالھ بوگون،

بىندەلىك اجرىن يوقاتمىگ كۆز و كۆز - منت بىلە.

اي خىداي عالمىن! بىز لرنى اۋزىنگ كېچىرىپ،

ھىم نصىب ايلە وصالىنگ، نعمتىنگ - جنت بىلە. جمعه - ۱۹ - سنبەلە ۹۵ - مېمە

## وصال و فراق اوضاعىسى

آله قنچه بۇلدى سېن دن من اوزاغ،

شو سېن دن بو يوره ك دير داغ - داغ.

سېن دن ايروليقده غم اۇلدورگوسى،

سېن بيلن بۇلگنده، غم دن من فراغ.

سېن دن ايروليقده كۇنگليم سۇليگن،

سېن بيلن بۇلگنده كۇنگليم باغ - باغ.

سېن دن ايروليقده كۇنگليم يانه دير،

سېن بيلن بۇلگنده اوت كۇنگليم ده ياغ.

سېن دن ايروليقده من، اېسكى كسل،

سېن بيلن بۇلگنده دير من، ساپه ساغ.

سېن دن ايروليقده آھيم آشگوسى،

سېن بيلن بۇلگنده، خوشليک تاغ - تاغ.

بيغله گى بېگ اۇغلى فرقت دردى دن،

سېويز سېن بيرله بۇلگن بيت و چاغ.

۲۵ - ۲۵ - ۹۵ - ميمنه

### ملامت كىم، سلامت كىم؟

بو آفت، بو بلا لرگە دېيىنگ دوستلر ملامت كىم؟

بو آفت، بو بلا لر اېلگى دن قالگن سلامت كىم؟

چېكرمىز قىغو - غم نى اېرتە - اقشەم، كېچە و كوندوز،

بو بىز چېككن الم دن آلكوسى آسىغ - حاوت كىم؟

عجب اوضاع و احوال دىر الم آستى دە قالگن مىز،

صداقت يۇق، عدالت يۇق، مگر بۇلدى قىامت كىم؟

جھالت - اۇقۇللىق نىنگ قۇيمە دىك يۇل ىرمى دە هرگز،

مگر، دايمى يۇلداش بۇلدى مى دېيىمىن جھالت كىم؟

قىلىنگان ايشلر يىمىزگە كـولـر شېكىللى تېنتكلر،

اوزىن ياشىردى مى دېيىمىن بوگون آنگ و فراست كىم؟

ايشانچ و اعتماد اېل و اولوس نى ترك اېتىب كېتدى،

عـجب ترقلدى اۈرنى گە كدورت هم عداوت كىم.

جنايت نى، خىانت نى، قىلرلر اۈيله مەى ذرە،

نېچون دېگندە: قۇلگە كېلگوسى تېكىن براءت كىم.

اگر سۇرسىگ كىشى دن اۈزنى مَقْتەب، بشقەنى سۇككەى،

سۇرەب بىلماق قىين بۇلدى، سلامت كىم؟ ملامت كىم؟

سە شنبە ۱۳ - مىزان - ۹۵ مىمنە

## الجيرهى له يمن .

او نینگ ھجرى دە چېككن قَيْغو - غم دن الجيرهى له يمن،

گۈپلر باشلريم، كۈرگن ستم دن الجيرهى له يمن .

وصالېگە بېتالمەي كېچە - كوندوز اۋكسېنيپ يېغلەب،

كۈرالمەي يىخشى دم يوتگن الم دن الجيرهى له يمن .

مېنىنگ وضعيم گە باقېب، قالدى آفت له بلا لرگە،

غميم نى چرچەمەي يازگن قلم دن الجيرهى له يمن .

كۈيېگە تېنمەيىن بارىب، كۈرەر من دېب جمالى نى،

بو يۈلدە آبلە اورگن قدم دن الجيرهى له يمن .

مېنىنگ اونگە بېتالمسليگيمە باعث بۈلېب تورگن،

دميم دە كۈندەلنگ نېچە يلم دن الجيرهى له يمن .

بۈلېب مېن دن جىدا، آرتدى فلاكت بارىن اوستيم گە،

بو كىلگن حسرتى دە قىدم دن الجيرهى له يمن .

دېگن لر اېسكى لر: اۈلگەي چىدەم نىنگ ميوەسى شېرىن،

ايشانىب اېندى بو سۈزگە چىدم دن الجيرهى له يمن .

۱۳-۱۳۹۸-جمعه بازار

## اوزاق توت اۇزنى اي كۇنگيل!

اۇزىن آغىر توتوچى دن، اوزاق توت اۇزنى اي كۇنگيل!

هدف - مقصد كوتوچى دن، اوزاق توت اۇزنى اي كۇنگيل!

او كىمسە بىرلە اۇرتاقلىش، سېنى ترك اېتمەسېن اصلا،

كە سېنىڭ اونوتوچى دن، اوزاق توت اۇزنى اي كۇنگيل!

چوغول - مكار - مۇذبۇدەن محبت كۇرمەگە ي سن ھېچ،

محبت ساوتوچى دن، اوزاق توت اۇزنى اي كۇنگيل!

مدام نفعى اوچون اۇيلىب، سېنىڭ قىسەنگە ھېچ بۇلمە ي،

اۇزىنى ياروتوچى دن، اوزاق توت اۇزنى اي كۇنگيل!

غمىنىڭە بۇلمەگن محزون، قووانچىنىڭە حسد قىلگن،

شكر - بالىنىڭ يوتوچى دن، اوزاق توت اۇزنى اي كۇنگيل!

اگر اوستىنىڭە كېلگندە سېنىڭ آزگىنە قىغو - غم،

بىو دەپ، قۇرقوتوچى دن، اوزاق توت اۇزنى اي كۇنگيل!

اۇزىنىڭە تېنىڭ - مناسب نى بو دم يخشى بېلىب آلگىن،

اۇزىن آغىر توتوچى دن، اوزاق توت اۇزنى اي كۇنگيل!

۵شنبە - ۲۲ - ميزان ۹۵ - خواجه سبز پوش.

## اۈزگچە

عصرى لىلىگە بۇلىيان عصرى مجنون اۈزگچە،

قىغو - غم قۇلىدە توشدېم زار و توتقون اۈزگچە.

تۇرت تمان دن قمرەب آلدى بو غرىب كۇنگلىم نى غم،

اۈبلەشىمچە يۇق مېنىنگ دېك بىر تە محزون اۈزگچە.

كون اۈتېب اھېم بۇلر آرتىق؛ الھېم لطف قىل!

ابل ايچىدە مېن كىي يۇق اھى افزون اۈزگچە.

ابلگرى لر مېن بىلن طرفە كولىب - اۈينر اېدى،

نې سبب دن بىلمەدېم اچىققە اكنون اۈزگچە.

بىر تمان دن جورەتر يار، بىر تمان دن ابل سۇكر،

واعجب! بۇلدىم الم - تھدىدگە مدفون اۈزگچە.

ھېچ قچان مېن او گۇزەل دن اوزمەگەى دېر من بورەك،

گرچە بۇلدىم فرقتى دن تېلبە - مجنون اۈزگچە.

اشنبە - ۱۶ - عقرب ۱۳۹۵ - مېمنە

## كۈنگىل آچىلر گل گل

تورخىنگ گه باقسم اي گل! كۈنگىل آچىلر گل گل،

بىل سۈزنى ساچى سنبىل! كۈنگىل آچىلر گل گل.

تېنگرى دن ايسته گه ي من وصلينگ نى نعمتىنى،

اميد و مقصديم شول، كۈنگىل آچىلر گل گل.

آھىم نى تىنگلەمس دن كېتىدى تورىب عَرَض لىب،

آھىم نى تىنگلەسە اول، كۈنگىل آچىلر گل گل.

باققە بارىب بلىل گە توشدى ك—ۈزىم و آيتدىم:

مېن دېك نوا له بلىل! كۈنگىل آچىلر گل گل.

كۈپ توشمەسىن قباغىنگ بىچارە عاشقىنگگە،

لطف ايله اېندى بىركول، كۈنگىل آچىلر گل گل.

۴شنبه - ۲۴ - قوس ۹۵ - مېمنه .

## بیر غزل

مثنوی یازسم می؟ یا که بیر قصیده؟ یا غزل؟

یوق، قصیده - مثنوی دن، مېنگه دیر زیبا غزل.

قاش و کۆز اؤرمک و یاناق، دوداغین اېسله سم،

آز و کۆپ بۆلور مېنینگ هم طبعیمه پیدا غزل.

وه! خیالی گه کېتیب، کیرسنگ ده شعرنینگ باغی گه،

وصفیده یازسنگ غزل، قیلگه ی عجب غوغا غزل.

قنچه یازسم تعریفی نی شعر ایله بؤلسم ادا،

بیرته، اؤننه، یوزته، مینگته، یا که بیر دنیا غزل.

مېن خیال دېنگزی گه چۆمیب غزل یازدیم، ولی،

تېلبه اېردیم، تېلبه راق قیلدی یو هم شیدا غزل.

مېن اؤکوش قیغو- هدیگ بیرله کوره ش ایلر اېدیم،

شونده بین ضیق پیتده قیلدیم، شو رقم انشا غزل.

۵ شنبه آقشام / ۱۶ / حمل / ۱۳۹۷ / جمعه بازار

## عصر چاغى نواسى

عصر چاغى بېنوالر دېك فغان چېكىدىم فغان،

تۆرت تماندن قيسدى مېنى بو زمين و بو زمان.

كەلىگىم كېلدى، دلىم تۆلدى، ندامت ايلەدەيم،

اۋىلە شىمچە مېن كىي ھېچ بىر كىشى يۇق بغرى قان.

ھەرتماندن بېي وفالققە اېرور من مېتلا،

بې وفالر سۆرمەدى حالىمنى، رنگىم دىر سمان.

برچە مېن گە يخشىلىق قىلمس، يمانلىق ايلەگەي،

بىلمەدەيم علت نىمە؟ مېن ياكە بختىم دىر يمان؟

گرچە بېلىم تۇغرى كۆرىنگەي الف دېك، كۆزلرە،

لىك، اىچىمدن قووجىرەب من ھمدە بۇلگنمن كمان.

گرچە مېنى تاختەمس دن شونددەيىن قىيىنر الم،

سىز الم - غم دن اوزاق بىشنەنگ ينە ساغ و امان.

عصر چاغى ۴ شنبە ۱۷/جوزا/۱۳۹۶/مىمنە

## ملت دردى

شوندە يىن ظلم و ستم، جبر و جفا كۈرگنمىسىز؟!

شوندە يىن ابل و اولوس، بختى قرا كۈرگنمىسىز؟!

بارىنى قۇلدىن بېرىپ، سرسان و سرگردان اۋلىپ،

برچە ذاتدىن ايرىلىپ، بې اۋى و جا كۈرگنمىسىز؟!

اۋلدى - كۈيدى ملتىم لېكن بو دولت كۈرمەگەي،

اوشبو دولت دېك بىران بې اعتنا كورگنمىسىز؟!

قييقىزىل قانىگە بولغندى غىرىپ - بېچارە ابل،

قييقىزىل قانىگە توپراقچە بېها كۈرگنمىسىز؟!

التى ياقدىن آلدى قمرەب ابل و خلقىمنى بلا،

اژدها دېك آغزى آچىلگن بلا كۈرگنمىسىز؟!

آتە، اۋغلىدىن جدا دىر، آتە ھم قىزدىن اوزاق،

دردىر، ابشىك مە ابشىك نان گدا كۈرگنمىسىز؟!

برچە ذاتىمىزنى يېب ھم تۈيمەگەي بو وحشىلر،

بوندى يىن آچ كۈز و ھم سېر اشتھا كۈرگنمىسىز؟!

ملتىم نىنگ دردى آغىر، كۈزى ياش، كۈنگلى يرا،

بو رقم وضعى يمانلرگە دوا كۈرگنمىسىز؟!

شنبە اقسام / ۸ / جدى / ۱۳۹۷ مىمنە

## اي كۈنگىل!

سېنى اېس دن چىقىردى، كېيىن دن آه اوردينگ اي كۈنگىل!

اميد ايله ب ينه قىتیب كېلر دېب توردينگ اي كۈنگىل!

بيلرمن چين يوره كدن سېن اۈزىنگنى اونگه تاپشیردينگ،

وفاسىز - اعتناء سىزگه محبت قوردىنگ اي كۈنگىل!

بۇياقلى سى سۇز و عهدىگه ايشاندىنگ، اۈيله مەى ذره،

عزیز عمرىنگنى هم شو يۇلدە سېن ساووردىنگ اي كۈنگىل!

او كه سيوگى دېگن حس دن بوتون محروم اېكن بيلدىم،

ولى، سېن سېويب او يادى ده دايم يوردىنگ اي كۈنگىل!

بياللمم قنچه فايده آلدىنگ اوشبو ايشلرىنگ بىرله،

بوتون بارىنگنى سېن اۈزىنگ شو يۇلدە اوردينگ اي كۈنگىل!

۴شنبه / ۷ / سرطان / ۱۳۹۶ / ميمنه

## غزل

آیریلیق نینگ اۇتى بیرله بۇلدى کۈنگلیم داغ - داغ،  
 کپل دوا قیلگین طبیبیم گر دېسم، دېر: «یاغ - یاغ»  
 آه و حسرت چپککنیم نی هیچ کیشی بیلمس مېنینگ،  
 لیده کولگو، دلده ارمان، باشده قیغو تاغ - تاغ.  
 وعده بېرگندی کپلرمن دېب، کپتیب، کپلمس نېته ی؟  
 اۇتدی عمریم مکرری بیرلن، قیلیمیشی دیر چاغ- چاغ.  
 بیر اگر کۈرسم یوزینگنی ای ستمگر دلربا!  
 غم گه تۈلگن اوشبو کۈنگیل قیتنه بۈلگی باغ- باغ.  
 قه ی ده یاشیردینگ اوزینگنی ای گۈزه لرنینگ سری،  
 اختەرر من زار و نالان تاغ و باغ و راغ - راغ.  
 مېن اگرچه درد و حسرت گه ابرور من مبتلا،  
 قیلمه سین تېنگیریم سېنی محنت گه دوچ، یور ساغ - ساغ.  
 بو بېگ اۇغلی عاشقینگنی ای گلیم قان ییغله تیب،  
 تشله دینگ، کپتدینگ توریب کۈنگلینی ایله ب داغ - دغ.  
 یکشبه - ۳۰ - دلوا یی - ۱۳۹۰ - خواجه سبزپوش

## غزل

بۇلىب آيرو سبور ياردن مېنىنگ حاليم پريشان دير،  
 قيزيل گل رنگى دېك بۇلىب بو كۇنگليم قىيقىزىل قان دير.  
 قەيان باقسىم اۇزىن يارى بيله هر كيمسه يورگن دير،  
 دريغا! مېن غريبگە قىغولر هر لحظه مهمان دير.  
 مېنىنگ باشيمگە كېلگن كونى، يارب، كۇرمەسىن هېچكيم،  
 كۇزيم ياش دە، دلیم اۇتدە، تىم محنت دە قالگان دير.  
 بو طالع همده بختيم دن هميشه ايله رم شكوه،  
 تنى اۇنگ سارى ايلنمس، هميشه چپگە چرخان دير.  
 بلا و فتنه و محنت اراسى دە توشيب قالديم،  
 ترحم قيلمەسنگ رېيم! بو حاليم انچه يامان دير.  
 طبيبلر كېلدى باشيمگە كۇريب حال خرابيمنى،  
 دېدىلر: هېچ توزه لمەيدى، بو دردى، درد هجران دير.  
 اميدىن اوزمەگە يارب بېگ اۇغلى رحمتينگدن هېچ،  
 اگرچه غرق عصيان دير، كۇزى لطفينگگە باققان دير.  
 پنجشنبه - ۲۳ - قوس - ۱۳۹۱ - خواجە سبزيوش

## سیندى بالیم

سیندى بالیم ایـریلیب او کۈزلىرى فتانهدن،  
هم ییراق قالدیم بوتون ابل و قریب، همخانهدن.

نې رقم دَور و زمان دیر، ای غریب بیچاره دل!  
ذره کورمس سن صداقت دوست ایله بیگانهدن.

کیمگه قیلسنگ همنشیلک، اۋزنى آلیس تونگوسی،  
هرکیشی کۈرگنده ایتر: تور اوزاق دیوانهدن.

قیغو و درد و المدن بۈلدى کۈنگیل یارهلر،  
بیر دمی مهر و وفانی کورمه دیم جانانهدن.

اعتناء سیز، کۈنگلی تاش ابرکن، هلی بیلدیم اونى،  
بیرکلیب آلمس خبر، بو عاشق سراسانهدن.

تانگ یېلى! بار قەى ده بۇلسە لطف اېتیب، کۈریب کلبیب،  
بیرمه بیر قیلگین بیان سۈزله مەى تابانهدن.

یاش تۈکیب ییغلر بیگاۋغلی ایکی کۈزدن زار - زار،  
سیندى بالیم ایریلیب دېب کۈزلىرى فتانهدن.

یکشنبه ۱- ۵- ۱۳۹۱- خواجه سیزپوش

## گۈزەل

مېن گە ھالى يار بۇلرسن مى؟ گۈزەل!

ياكە بۇلمەى اۋلديرسن مى؟ گۈزەل!

ايرىلىق نىنگ اۋتى دە جورىنگ بىلن،

خستە كۈنگلىم كۈيدىرسن مى؟ گۈزەل!

آى ويىل بۇلدى چېكر من درد وغم،

بىرقولاغىنگى توترسن مى؟ گۈزەل!

تېلبە ايلب تشلەدىنگ، كېتىدىنگ تورىب،

بىر كۈنى يۇقلىب كېلرسن مى؟ گۈزەل!

كېچە - كۈندۈز بۇلدى بورچىم بىغلەماق،

بىردىمى سېۋىنتىرسن مى؟ گۈزەل!

اې يۈزى آى، قاشلىرى ياي، كۈزى جام،

قېقرا كۈنگلىم ياررسن مى؟ گۈزەل!

رحم اېتىب وصلىنگى جامى دن مېنى،

قېتەدن بىر تۈيدىرسن مى؟ گۈزەل!

باغ ارا بىردم بېگ اۋغلى بىرلە سېن،

قۇلمەقۇل بۇلىب يوررسن مى؟ گۈزەل!

پنجشنبه - ۲۲ - ۴ - ۱۳۹۱ -

### بیزنى اونوتمه

قدى سرو اي صنم بیزنى اونوتمه،

یوزى گل - قاش قلم، بیزنى اونوتمه.

همیشه مبن گه ابدینگ مهربان سبن،

نېگه قیلدینگ ستم بیزنى اونوتمه.

ینه قیل قیته دن کۈنگلیم نی روشن،

تاقچان رنج و غم بیزنى اونوتمه.

ینه یاققین --- محبت نینگ چراغین،

اېتیبان بیر کرم بیزنى اونوتمه.

سېنینگ جبرینگ دن اي یار ستمگر،

یوترمن زهر و سم بیزنى اونوتمه.

کېچه - کوندوز غمینگ دن ناله ایلب،

تۈکر من اشک و نم بیزنى اونوتمه.

بېگ اۋغلین یۈخله گین اي گلعداریم!

گېی یۇق کۈپ و کم بیزنى اونوتمه.

۱شنبه - ۱۳۹۳ - ۱۲ - ۲۴ - میمنه دارالعلوم ابو مسلم

## اى - بېگىم!

اېشىتىنگ اھىم نى اېندى اې قلم قاش اى بېگىم!

قنچەلر بۇلسىن غمىنىڭىزدن كۈزىم ياش اى بېگىم!

كېچە - كوندوز تىللەشيب مېن بىرلە سىز جنجالدە سىز،

مونچە ھم بۇلگەي اېكندە جنگ و پرخاش اى بېگىم!

اېشىكىنىڭىزگە بارىب كۈپ يىغلەدېم بغرىم اېزىب،

توتمەدىنىڭىز بىر قولاق، كۈنگىز اېكن تاش اى بېگىم!

شېلە نرسىز لىخظە - لىخظە اۋلدىررمن دېب سېنى،

كېسىنىڭىز اېلىنگ كېسىنىڭ خذمتدە بوباش اى بېگىم!

تاتىرىك من كۈنگىل اوزم اى بېگىم سىزدن تىنى،

مېن بىلە دىنداش، اولوسداش، ھم وطنداش اى بېگىم!

تورسە بختىم، بۇلسە فرصت، سىزگە بۇلسم يوزمە يوز،

درد دل نى سىزگە تىيان ايلەسم كاش اى بېگىم!

سىزگە بۇلىب مبتلا مېن يىخشى كون نى كۈرمەدېم،

ھمدە بۇلدى حسرتىڭىز اھ! بېمك - آش - اى بېگىم!

بىلمەدېم سېوگى - محبت جرم اېكن مى؟ دوستلر!

يىغدىلر اوستىمگە لوچكلرلە - بدماش اى بېگىم!

اې بېگ اۋغلى! ياشىرىب اېردىم محبت رازى نى،

اىشترابلىب قىلدىلر عالم ارا فاش اى بېگىم!

يىكشنبە كېچە ۵ - قوس - ۱۳۹۴ - مېمنە

## كاوله- قاز

رازنى بيلمىسلىرگە اصــــلا ايتمه راز،

فاش ايتيب اوستينىگگە چلگە ي قنچە ساز.

هر كيشى گە ابر كه ليك هم قيلمه گين،

او كيشى گە قيل كه بيلسه قدر ناز.

تېنگرى گە قــــييل بنده ليك ايتيب ثناء،

كۈنگين اۈز رزقينيگگە كۈپ دير ياكە از.

اۈنيمي يۇق سۈزنى هرگز يازمه گين،

دايما سېن فايدهلى سۈزلىرى ياز.

گرگيرىسنگ، حقنى آيت، باطلنى قۇي،

بۈلمه گين هېچ بيرقــــچان سېن يكە تاز.

علم و دانش كيپنيدن توشگين مدام،

مقصدىنگ تاپگينچه جهد ايت تاغنى قاز.

دايما اۈزىنگنى ستره سقله گين،

المه سين باش - همده جسمينگ چرك و ماز.

اي بېگ اۇغلى كېتىدى تېكىن وا اسف!

قۇللىرىنگدن كۈكلم و كوز - قيش و ياز.

دوشنبه كيچە ۵- ۱۲- ۱۳۹۴

## وادريغ

كۆيدى آيسليكىدە جانئيم وادريغ،

يىغلهگەي من بۇلدى رنگيم سېسريغ.

نې رقم دۆر و زمان دير اوشبو دۆر،

بۇلدى بوغداي بىرله بير ينگليغ تريغ.

بعضيلر نىنگ شومليگى باعث بۇليب،

قوپه قورئغ بۇلدى دريا و اريغ.

تكنالوژى بۇلسه شوندهي، كييمه ديم،

«كفش تى جى»، مېنگه بس اېسكى چريغ.

اې بېگاۋغلى كېتىدى اېلدىن لطف و مهر.

وادريغئا! - وادريغئا! وادريغئا!

پنجشنبه - ۲۴ - دلو - ۱۳۹۲ اندخوى

يکشنبه كيچه - ۵ - قوس - ۱۳۹۴ - ميمنه

## اي يار زببا!

كېلگىن قاشىمىم گه اي يار زببا!

بۇيىنگى اېندى اىله ي تماشا.

لعلينگ شىكر دور، كۈزىنگ فسونگر،

قاشىنگ اېرور يا، زلفىنگ چو يىدا.

ايدېك بۇلبىان ساچگه ي يوزىنگ نور،

اي تيشلىرى دُر، اي قىدِ رعنا!

هجرىنگده يانىب، يۇلىنگده ياتگوم،

بىر كۈرگى كېل حالىمنى جانا!

كۈنغىلده يوقدور اصلا قىرارىم،

اوزىنگ كېلىپ اېت دردىم مُداوا.

درد و غمىنگدن آخىر اۇلرمن،

ايلب وصالىنگ دايىم تمنا.

اي كۈزى خونخوار، عالمده قىلدىنگ.

سرسان و مجنون هم زار و رسوا.

دادىمنى تىنگله اي يار برنا!

ظالم قولىنگدن مىنگ شور و غوغا.

كۈزدن كېتر ياش مانىدِ دريا.

هجرىنگده كۈيدىم قىلدىم فغانلر،

هر لحظه، مېنىنگ كونگلىم گه تورگى -

بىغلر بېگ اۋغلى عشقىنگده اورتب،

چهارشنبه ۵ - ۱۱ - ۹۰ جمعه بازار

## خدايارينگ!

بو يورت دن اېندى كېتگه يمىن، قلم قاشيم، خدايارينگ!

اَلِيْب اُوْزگه وطنلرگه غريب باشيم، خدايارينگ!

خدا پشت و پناهينگ بۇلسين اې ياريم بوگون كېتديم،

بۇلېب سېن دن جدا، كۇزدن اَقِيْب ياشيم، خدايارينگ!

قرا تونلر، ياروغ كونلر، ضعيف كۇنگلېم ده سېن اېردينگ،

مداريم، طاقتيم، رازيم گه سرداشيم، خدايارينگ!

بيلرمن سېن دن ايريلسم بۇلېب مۇل آه و افغانيم،

بۇلر آغو كېى مېنينگ ايچن اَشيم، خدايارينگ!

مدام يانيم ده بۇلېب غم نى مېن دن اَلِيْس ايلردينگ،

دواسيز دردده داروم، يۇلده يۇلداشيم، خدايارينگ!

بېگ اۇغلى كېتدى يار و هم وطن نى تېنگرى گه تشلب،

خدايارينگ! وطنداشيم، وطنداشيم خدايارينگ!

چهارشنبه - عقرب - ۱۸ - ۸ - ۱۳۹۰ - خواجه سبزو ش

## تنى اۇيغنمەدى

بو اولوس غفلتدە ياتدى، پە! تنى اۇيغنمەدى،

قىيغو درياسى دە باتدى، پە! تنى اۇيغنمەدى.

اۋيلەمسدن، چۈتلەمسدن اۋز بيريىنى تانيمەي،

بىر- بىراو گە اۋقنى آتدى، پە! تنى اۇيغنمەدى.

بشقەلر نفعى اوچون خىرتكە خىرتك بۇلدى يو،

ياش يىگىتلرنى يوقاتدى، پە! تنى اۇيغنمەدى.

بعضى اوياتسىز كىشىلر كۈر قىلىپ وجدانىنى،

اۋزىنى دنيا گە ساتدى، پە! تنى اۇيغنمەدى.

بشقەلر اۋگيت آلىب بىرلشدى، اما بو اولوس،

ايرىلىق تۈزىنى تاتدى، پە! تنى اۇيغنمەدى.

اې خدا! بىزلرنى، قىلگىن، قىلبيمىزنى سېن صفا،

قارەتاش دن گندە قاتدى، پە! تنى اۇيغنمەدى.

۴ شنبه - ۱۲ - جوزا ۱۳۹۵ - ميمنه

## اخ اخ كباب اۋلديم

قندەي بۇشەتەي دلدەگى قىغو - الميمنى،

قندەي بۇشەتەي دلدەگى حسرت لە غمىم نى.

مىن تىلبە بىران كېز كۈچەسى دن اۋتر اپردىم،

سېن اۋتمە كۈچەم دن دېبان اۋل توتدى دمىم نى.

فرقت يوكى دن ياي بۇلە قالدى قد و بۇيىم،

قندەي توزەتەي مېن غرىب قىد خىمىم نى.

بىر كاسە ساووق سوو تىلەدىم طالا خۇمى دن،

افسوس كە روا كۈرمەدى اوشبو تىلەمىم نى.

وصلى كە يېتەي دېب رېجە آلب كوشش اپتدىم،

بېھودە قىلىب كېتدى مېنىڭ بىرچە چىمىم نى.

خى قنچە ستم ايلەسە ھم ايلەسەين اول گل،

عمرى نى اوزاق ايلەسەين اللە چىدەمىم نى.

اې رب جـهان! لطف و كرم قىل مېنگە اۋزىنگ،

قىغو يوكى دن ھېچ كۈتارالمەم قىدمىم نى.

چاغ تىلبەلر اپچرە مېنى يوتگن الميم بس،

ھېچ كىمسەگە كۈرستمە اللھىم بو غمىم نى.

ھجرىدە كۋىيب، مېن، اونى اخ اخ كباب اۋلدىم،  
مېن كىمگە دېيە ى درد و غم اول صنمىمىنى.

مېن كۋىي گە بارىب كېچە - كوندوز نالە قىلدىم.

ھېچ كۈرمەدى كۈزلردە گى بو اشك و نمىمىنى.

ملت بىلە يارىم غمى دن گاهى يازر من،  
اېلگىم دن آلە كۈرمە بو قاغذ قلمىمىنى.

ھەر نېچە دە سىز لر گە بىران شعر اوزە تر من،

كۈپ اۋرنى گە كۈرىنگ صمىمى لر بو كمىمىنى.

نېگە دېمە يىن تېنگرىمە بېگاۋغلى تناء، مېن،

باشىم دە كۈرەر من كرم ذوالكرمىمىنى.

۳شنبه - ۱۹ - اسد ۱۳۹۵ - مېمنە

### حيف - حيف

اؤتدى عمریم قیغو - غم گه حيف - حيف،

حسرت و درد و الم گه حيف - حيف.

اؤزنى بیلدیم یخشی کوننى کؤرمه دیم،

دوچ کبلیب قالدیم ستمگه حيف - حيف.

بشقه لیر یازسه قلم گه، خوشلیغین،

مېن یازر من غم قلم گه حيف - حيف.

بعضى وقت دوچ کبلیگنیم دن رنج ده من،

بعضى بیر یلتاق - یلمگه حيف - حيف.

چاپلوس - یلتاق کیشی لر ابلگی دن،

کؤز تۆلیب دیر اشک و نم گه حيف - حيف.

کیم ایشیتسین مېن غریب نینگ نالیشین؟

یېتمسه آھیم صنم گه حيف - حيف.

اؤز قؤلیم دن دیر بو کلفتلر، بیلینگ!

قیلمه دیم عرض - ذوالکرم گه حيف - حيف.

۴شنبه - ۳- سنبله ۱۳۹۵- میمنه

## نازىن كېلدى

تەڭگە تورور اېردىم، توستەن نازىن كېلدى،  
 بېرىپ كېلەم گە يارقىنلىك نىگار مەجىن كېلدى.  
 بېزەب اۋزىن پىرى لىر دېك، تەقىب آلتىن تەقچاغىن،  
 سېپىب مۇشك و عطىرلىرى، سالىب قۇل گە نىگىن، كېلدى.  
 فراقى دە تۇكر اېردىم كۈزىم ياشىنى يامغىر دېك،  
 توشىب كۈنگى گە رحمى، كۈرگى بو تېلەسىن، كېلدى.  
 تۈرىب جايدىن، غرىپىنگ باشىگە كېلدىنگ، دېدىم، سېن خوش!  
 دېدى: قشاقنى سېوگەيمىن، بو سۈزى تۇغرى - چىن كېلدى.  
 دېدىم: قشاقنى اېسلىب قندەيىن باسدىنگ قىدم بول يان؟  
 دېدى: معشوقەلر رسمى ھمىشە شۈندەيىن كېلدى.  
 دېدىم: اۋت تۈرىگە اوينى، خىدا كم قىلمەسىن سېنى،  
 اۋتېب اۋلتىردى كېلەم گە، دېدىم: شمس نۈين كېلدى.  
 دېدى: يانىم گە اۋلتىر، كېلىپ، اې عشقىم بىلە كۈيگن!  
 دېدىم اۋزىمگە: (بارىپ يانى گە تور، وقت ھمىن كېلدى.)  
 بارىپ يانى گە اۋلتىردىم، ئنا ايتىپ خىدايىم گە،  
 دېدىم كۈنگىمگە: طالع توردى يارىم در كىمىن كېلدى.  
 عجايب قىسەلر ايتىپ اۋلتىردىك ايكىمىز يالغىز،

دېدى: مېن اېندى كېتگە يمن، نماز وقتى يقين كېلدى.

دېدىم: دراۋ غريبينگ يانى دن كېتگە يموسن؟ اي گل!

دېدى: كېتدىم، ينه كېلگيم و تصميم بونده يين كېلدى.

دېدىم: يارينگ خدا بولسين، عزيزيم هر يېره بولسنگ!

بيراق، بير تېزراق كېلگين اجلل مېن گە يقين كېلدى.

قوياش چىقدى يو كلبەمدن، اوييم گور سينگرى بولدى،

ينه هم باشلەدیم ييغى، كۆزيم دن بحر چين كېلدى.

ييل و آى لر بوليب كېتدى، خبر يۇق او تمانى دن،

بېگ اۋغلى دنياده يورماققە اېندى كۇپ قيين كېلدى.

۶-۶-۱۳۹۰ جمعه بازار

### قىز غنسه قىز غنسىن

كېلىپ كۆر بو يمان حاليم! فلک قىز غنسه قىز غنسىن،

هميشه قىز غنووچى، كۆر نمک قىز غنسه قىز غنسىن.

چىقه يلىك ايکىمىز باققه و يا دريا قىراغى گه،

باقىب سوگىمىزه، بلبل - سمک قىز غنسه قىز غنسىن.

قىله يلىك كۆنگلیمىزدن كينه و كدرت نى بىز آيس،

قرب پاك دللىمىز گه، ملك قىز غنسه قىز غنسىن.

بيله يلىك بىر - بىرىمىز قىدرىمىزنى اېندى بوندن سۇنگ،

كۆرىب همده چىدالمه ي، هر جتک قىز غنسه قىز غنسىن.

مېن و سېن چىن يوره كدن، بىرىراو گه اعتماد اېتسك،

اېمس من فرقى گه، هر بىر كېسك قىز غنسه قىز غنسىن.

جمعه - ۱۸ - حوت - ۱۳۹۶ - جمعه بازار

### تاش ياغمەسە...

بو دىانت بىزدە بار كە، قـۇرقەمن باش ياغمەسە!..

«اوستىمىزگە آسـماندن ژالە دېك تاش ياغمەسە»

اوشبو ملت بىر - بىراو نى كوندە - كوندە اۋلدىرەر،

كۈرمەدەيم بىر كون نى هرگز، اۋلىك و لاش ياغمەسە.

كـۈچە - كۈي، قىشلاق و يىلاقلردە لوچكلر زعيم،

بو رزىمدن بارە - بارە لات و بدماش ياغمەسە!؟

بىز قىلىتگان ايش نى: ( سىچقانلر گـدامدە قىلمەگەي)

روزىمىز اۋتمس، اوگـون بىزلرگە پرخاش ياغمەسە!

كۈرمەگەيمىز هېچ قچان بىز، يىخسى كون نى اي اولوس!

تاكە، ترك اېتمەي يمان ايش، كۈزدە نم- ياش ياغمەسە!

يا الهى! بىزگە بېرگىن بخت و بردملىك اۋزىنگ،

شونده بىن بختى كە، اونگە ذم و فـحاش ياغمەسە.

شنبه / ۱ / ثور / ۱۳۹۷ مىمنە

## باشقە طاقت مېندە يۇق

اۋلدى - اۋلدى كۆپ اېشىتىدىم، باشقە طاقت مېندە يۇق،

درد و قىيىنلىقلردە باتىدىم، تىنچ و راحت مېندە يۇق.

ياغدى اۈلكەم ھەم اېلىم اوستى گە كلفت يامغىرى،

بو فلاكتلر سېبىلى استراحت مېندە يۇق.

بو وطن ھمدە اولوس خالى گە باقىب يىغلىدىم،

قىغو - غەم دن خالى بۇلگن بۇلسە ساعت مېندە يۇق.

مېن، وطن بىرلە اولوس نى بې غرض سېودىم مدام،

باشقەلر دېك اۈبلەمىگ، فكر تجارت مېندە يۇق.

ساتدى خلقىم نى درىغا! نېچە ساتقىنچى - رذىل،

بابە - اجداد دن، بېلىنگلر! بو رذالست مېندە يۇق.

بالەسەن قانى گە يورتىم بۇلدى ھەر لىحظە قىزىل،

شۇ سېبدن روح و جىسمىم گە سلامت مېندە يۇق.

بو اولوس اوستى گە بازارىم قىزىتمەم ھېچ قىچان،

ھەم قباحست بىرلە جىتھە، ھەم جىنايت مېندە يۇق.

اې خدا! جرمىم نى كېچىر ھمدە قىل يورتىم نى تىنچ،

گرچە درگاھىنگە لايىق بۇلسە طاعت، مېندە يۇق.

## وطنداشلر!

یوره میز می؟ عداوت تاشی نی آتیب وطنداشلر!

فلاکت یوکی آستی ده سسیب یاتیب وطنداشلر!

اولوس حیران، وطن اشغال، بوتون بایلیگیمیز تاراج،

یا ته میز می؟ شوو حالتلر بیله قاتیب وطنداشلر!

وطن، انسان گه ایکیچی آنه دیر، حرمتی اولکن،

کپته میز می؟ وطن نی یاولره ساتیب وطنداشلر!

کپلینگلر قؤلمه قؤل بولیب وطن نی ابرکین ایله یلیک،

کپزه میز می؟ محبت توزینی تاتیب وطنداشلر!

کوره کون بار مېکن یخشی شرایط، یشنه سک بیزهم،

صداقت - سبوگی نینگ دېنگیزی ده باتیب وطنداشلر!

نصیب ایتسین اولوغ تېنگریم بیزه بیرلیک و وحدت نی،

یشه یلیک اویقودن بیر - بیرنی اویغاتیب وطنداشلر!

۴ شنبه - ۱۹ - ثور - ۱۳۹۷ - میمنه

مولانا گدانینگ غزلى گه ايزداشلىك قىلىپ يازىلگن.

بۇلغەي؟ بۇلمەغەي؟

اېل ايچىندە مېن كىي محــــزون بۇلغەي؟ بۇلمەغەي؟

غم يوكيدىن قامتى چون نــــون بۇلغەي؟ بۇلمەغەي؟

لحظه - لحظه كۇكى كۇيب ايرىلىق نىنگ اۋتى دىن،

بو كۇيىش دىن، نالىشى افــــزون بۇلغەي؟ بۇلمەغەي؟

آنگ و عقلىنى بېرىپ قۇلدىن كېزىپ دشــــت و دمن،

اېل و عالم آغزى دە مضمــــون بۇلغەي؟ بۇلمەغەي؟

دايما يۇلىم تۇسىب هــــم قويدى توزاق ياولرىم،

ياولرىم دېك مونچە پست و دون بۇلغەي؟ بۇلمەغەي؟

بىر تــــمان دن بارى قىيىن، بىر تــــمان دن اېل سۇكىب،

قرغىش و قىيىناق ايله مدفــــون بۇلغەي؟ بۇلمەغەي؟

يلى يىنگلىغ بىر گۇزەل غــــه تاپشيريپ چىندىن يوره ك،

مېن كىي عالم دە بىر مجــــنون بۇلغەي؟ بۇلمەغەي؟

يکشنبه كېچە / ۲۰ / جوزا / ۱۳۹۷ / ميمنه

## عجب طالع

كۆزيم دن آفه دير ياشيم،

ابرو ر آغو بېگن آشيم.

بو قيغو رنج و حسرت دن،

كېته ي قه ي گه آليب باشيم.

عجايب هېچكيمي يوق من،

اوزاق دير قوم و قرداشيم.

قاليب من يكه و يلغوز،

كيشي يوق بولسه يولداسيم.

عجب طالع و بختيم بار،

مېنى ترك ايتدى سرداشيم.

ستمگر - مهر سيزلردېك،

ستم قيلدى قلم قاشيم.

اوزينگدن باشقه كويمس دير،

اوزينگگه، اي غريب باشيم.

شنبه / ۲۷ / جوزا / ۱۳۹۷ / جمعه بازار

استاد قاری محمد عظیم عظیمی سرپلی شعریگه نظیره

ای قهرمان ابل!

سپینگ ای قهرمان ابل! غیرت و عارینگگه سلمنا،

کمالات منبعی «تاریخ پربارینگگه سلمنا»

رقیبگه قؤل اوزاتمهی، اېگمه دینگ باشینگی هم هرگز،

حقیقت لرنی قورقمهی قیلگن اظهارینگگه سلمنا.

همیشه حق اوچون قیلدینگ «جهاد فی سبیل الله»

جهاد فی سبیل الله و پیکارینگگه سلمنا.

قوریدی بابه - اجدادینگ وطمن توپراغینی دایم،

قوری سبن هم وطن نی چشم بیدارینگگه سلمنا.

وطن، ای آنه تورکستان، عزیزسن مېنگه جانیم دېک،

کونگیلگه ساچگوچی خوشلیک نی گلزارینگگه سلمنا.

بېگ اۇغلی! دین و یورت، ابل و تیلیم دېب، قنچه یازدینگ شعر،

اوقیب کورسه دېگهی اوقووچی «اشعارینگگه سلمنا»

۵۱. شنبه ۲۱. سرطان / ۱۳۹۷ / مزار شریف

## ای خلق!

سپینگ حقینگده خاینلر خیانت قیلدیلر، ای خلق!

تؤکیب ناحق قیزیل قانینگ جنایت قیلدیلر، ای خلق!

بیلرمن کیم سپینگ کؤنگلینگ ابرور داکه کی ستره،

شو کؤنگلینگ ستره لیک دن کؤپ اهانت قیلدیلر، ای خلق!

همیشه یخشیلیک قیلدینگ صداقت رشته سین اوشلب،

ولی فاشیست و جانلر شرارت قیلدیلر، ای خلق!

سپینگ حق و حقوقینگنی ایاغ آستی ایتیب هر دم،

و حتی اؤتمیشینگنی هم حقات قیلدیلر، ای خلق!

کؤزینگنی یخشلی آچیب تورت تمان گه یخشلیب باققین،

رذیلر سینگه شیطانلی سیاست قیلدیلر، ای خلق!

بیلیب قوی! نچه تاجر آدرسینگدن چوکی گه ییتیب،

سپنی افسدن چقردیلر، تجارت قیلدیلر، ای خلق!

کؤزینگ یاشی، قیزیل قانینگ، سریع رنگینگه باقمس دن،

باریب یوینگه اگیب باش، قرابت قیلدیلر، ای خلق!

شنبه / ۲۱ / سرطان / ۱۳۹۷ / مزار شریف

اۋزبېك شاعرلرى گروهى دە نوایى بابانىنگ قوییده گى بيتى مشاعره گە قوییلگن اېدى. انه شو مشاعره دن مېنىنگ سھمىم قوییده گى غزل دیر .

گل چاغى هر گل گە بیر بلبل ترنم کورگوريب < تازە قانلیغ داغ ایله کونگلیم قوشى افغان توزیب «نوایى»

### نقره اېلیک

سۆزى يالغان كېتىدى تشب يۇل اوزه اۇلتورغوزيب،

آزگينه اعمار بۇلگن دل نى يىنگى دن بوزيب.

اوشبو مسكين گە اونىنگ مىلى يۇق اېردى، نې اوچون؟

قلبى گە اۇتلرنى ياقدى ايگى كۆزىنى سوزيب.

وا عجب! اينىقسە كۇلتلرگە بۇلدىم مبتلا،

دارالاحزان دە ياتيب من غم يوكى بېلىم اوزيب.

فرحت و كيف و قووانچ دن كۇرمەدیم هرگز درك،

تاكە تشلب كېتىدى مېنى غم قۇليده توتقوزيب.

رنج و حسرت دن قوتيلگە يمىن او وقت و او زمان،

لطف ایله حالیمنى سۇرسە گل بوزىنى كۇرگوزيب.

قالمەگە ى كۇنگلیم دە ارمان كۇرسە حالیم، آغزیمه -

نقره اېلیک بیرلە نېچە تامچى سوونى تاموزيب. جمعه ۲۰- قوس ۱۳۹۷ میمنه

اۋزبېك شاعرلرى گروھى دە نوايى بابانىنگ بىر بيتى مشاعرە گە قويلگن اېدى. انه شو مشاعرە دن مېنىنگ سھمىم قويىدە گى غزل دىر .

### ھەر تمان دن تېپكىلندىم

مېنى قتل اېتماق اوچون ظالم قۇلى گە آلدى تىغ ،

كۈيمەدى ھەرگز دە كۈنگلى قنچە اورسم چر و چىغ .

كىمنى كۈرسىم ، مېن ، اونى جان دن سېور من دېر اېدىم ،

بېردى اخطار ، جىركىلب ، اې تېلبە دېب آغزىنگىنى يىغ .

بس كە چېكىدىم رنج و محنت ايرىلىق نىنگ دردى دن ،

شو طفىلى بۇلدى بېلىم ياي و رنگىم سېسىرىغ .

چىن يۈرە ك دن اونگە مھرىم باغله دىم اې دوستلر !

تاپمە گە ي آچون نى كېزسە مېن كى كۈنگلى تىنىغ .

توشلر يە دە قۇرقە من قندە ي بۇلر حالىم دېبان ،

بىلسىنىگىز تائىرى دن چىققن دودا غىم گە اوچىغ .

ھەر تمان دن تېپكىلندىم يار و اغيار اېلگى دن ،

شو اوچون كۈزىم دە ياش ، باشىم دە تاش ، كۈنگلىم سىنىغ .

اې بېگاۋغلى ! كېتدى فرصت بىلمە دىنگ قىدرىن تنى ،

وادرىغىغا ! وادرىغىغا ! وادرىغىغا ! وادرىغىغا !

جمعه ۱۴ جدى ۱۳۹۷ مېمنه

اۈزبېك شاعرلرى گروھى دە بۇلگن مشاعرە دن.

### اېلىم نى تىندىرمەسم بۇلمس...

كوچىم بارىچە بو اېلىم نى مېن تىندىرمەسم بۇلمس،

فلاكت او قوسى دن اېندى او يغان تىرمەسم بۇلمس.

قىلىچ - اۇق دۈرى اۋتدى يىنگى چە اۋىلەش كېرەك بۇلدى،

قلم بىرلە ياووزلر بېلى نى سىندىرمەسم بۇلمس.

حرىفلر بىزگە باقمەي آلغە كېتماقلىكىنى اىستەيدى،

اولردن آرتدە قالگن بو اېلىم آشىرمەسم بۇلمس.

رقىبگە زىرەئىب باقمس، مېنىنگ حقىمنى بېرمەيدى،

يىلان بۇلگندە هم، حقىم نى مېن اۋندىرمەسم بۇلمس.

اېلىم نى يىخشى ايشلر، اېزگو يۇللرگە اېتىب تشويق،

يمان ايش، اېگرى يۇللردن يوزىن اۋگىرمەسم بۇلمس.

نوايى، تېمور و بابىر نى يىخشى تانىشىم لازم،

تواريخ دفتىرگە اېندى يىخشى كىرمەسم بۇلمس.

جمعه ۶/مىزان/۱۳۹۷ مىمنه

اۋزبېك شاعرلرى گروهى ده بۇلگن مشاعره دن.

### عليك آلگين سلاميم...

اگرده سـبـن گه يبتسه تۈلین آييم!

سلاميمنى عليك آل قاشى ياييم.

اگر بيركون اوزاغ توشسم اۋزینگدن،

آلور عالمنى هرردم آه و واييم.

غريبينگ كۈنگلى قان دير، كۈزى ياشلى،

تلطف ايله گين اي كۈركه باييم!

ساجيب باشيم گه كولنى، ييغله گه يمن،

و هم غم كلبه سى دير اوى و جاييم.

اولوس حيران كۈريب حاليمنى مېنينگ،

ولسى، سېنگه يېتېشمس دير نواييم.

خيالينگ دېنگيزى گه باردى چۈمسم،

قالور ترموس ده ساووب اوندە چاييم.

بىراق، سېن يشنه هرردم اېرکه تاييم.

ترحم ايله تينگلب هاى - هاييم.

الم بارى مېنينگ بېليم نى بوكدى،

شو حاضر سېندن اصلى ايسته گيم بو:

جمعه ۳۰ / سنبله ۹۷ / ميمنه

اۋزبېك شاعرلرى گروهى دە بۈلگن مشاعرە دن.

### اۋچرەدېم...

لعلى بال، كۈزى قـراگە اۋچرەدېم،

جسمى نقره، قاشى ياگە اۋچرەدېم.

يوققە قـرسىن باشىگە پير - پيرلىتىب،

قـۋلى رنگلنگن حـناگە اۋچرەدېم.

دايما ايلر كـرشمە بيرلە ناز،

ايشلرى ناز و اداگە اۋچرەدېم.

يوزلرى لـو - لـو يانر اۋتدېك بۈلىب،

بيلمەسنگ بيل، مەلقاگە اۋچرەدېم.

انچە آغير همده كم گپ، مـهربان،

اۋيله كيم كان حياگە اۋچرەدېم.

باشقەلر جـورر صنمـلر ابلگى دن،

شكر، مېن كۈنگلى صفاگە اۋچرەدېم.

بير قرەب كۈنگلېمنى مفتون ايله گن،

بير سبويملى دلـرباگە اۋچرەدېم.

جمعه اقشام/۱۶/سنبله/۹۷/مېمنه

اۋزبېك شاعرلىرى گروھى دە بۇلگن مشاعرە دن.

### بۇلمەسە

كاشكى دلردە قىغو بۇلمەسە،

شوم قورال بىر - بىرگە اتو بۇلمەسە.

بىلمە اۋزىنگنى تىرىك (هرگز دە هم)،

تا آتىنگ دنيـاده منگو بۇلمەسە.

اصلى سرداشىم مېنىگ ھېچكىم اېمس،

تاكە يانباشىم دە مېرو بۇلمەسە.

سېنسيزىن مېنگە قىين دىر يشنە ماق،

كۇپ قىين دىر باردى ياغدو بۇلمەسە.

كۈزى جيرانلر بىلە دنيـا گۈزەل،

ياقمەگە ي اۋرمان دە آھو بۇلمەسە.

آنە تىل گە يازمەگە ي اېرکن كىشى،

رنجىمس اۋرتاغى دن ھېچ بىر كىشى،

يخشى كۈرىنمس كۈزىم گە مامە آي،

تون اگر يخشى قرانغو بۇلمەسە.

جمعه / ۲۳ / سنبله / ۹۷ / ميمنه

اۋزبېك شاعرلرى گروھى دە بابر بابائىنگ قويدەگى بيتى مشاعرە گە قويىلگن اېدى. انە شو مشاعرە دن مېنىنگ سھمىم قويدەگى غزل دىر.

تا اَلغالى كۈنگىلىم نى اول يوز بىلە اول گېسو <>><> كوندوز مَنگا نى آرام، كېچە مَنگا نى اويقو. بابر

### قلم، بس قىل!

تا اَلدى قىلاراريم نى كۈنگىل دن اۋشە گلرو،

خوشلىك مېنى ترك اېتىدى، بۇلدى انىسىم قىغو.

ھردم اونى اېسلرمن، ساووغ - ساووغ آھ تارتىب،

اې آھ! اونىنگ ھجرى دە بۇلدى يېمىشىم آغو.

بىر - بىرگە ايماء ايلب، بو تېلەگە باققىن، دېسب،

حاليم گە اولوس كولدى، بغيريم نى اېتىب سوو - سوو.

او، قىغو - الم لردن دالم دە اوزاق بۇلسىن،

ھر قنچە كە مېن بۇلدىم ياولر ايجى دە كولوگو.

كوندوز غمى دن يىغلىب بىر يېردە قىلاراريم يۇق،

تون ھم او اوچون اۋىلب، كېلمس كۈزىمە اويقو.

او گرچە مېنى سۇكدى، ھم ھرنە دېدى، اما:

بىر گل دېمەدىم اونگە «اې كۈنگلىسى قرا، بدخو»

كۈپ يازمە مېنىنگ قىغو - رنجىم نى قلم، بس قىل،

گر بال و عىسل بۇلسە كۈنگىل گە اورر، اسرو.

جمعه. ۴. عقرب. ۹۷. مېمنە

اۈزبېك شاعرلرى گروهى ده بۇلگن مشاعره دن.

## سَنَر مَن آى و يولدوزنى

بناگاه بېر كۇريب دېوانه سى بۇلديم پرى يوزنى،

خيالى بېرله تونلرده سنرمن آى و يولدوزنى.

اگر، سېوماقچى بۇلسنگ، مېن كېى، سېو! بېتته دلېرنى،

«كۇتارېب بۇلمه گه ي بېر قۇلگه هرگزر ايكى تربوزنى»

اگر آتېمنى شېرىن تېل گه آلىب سېوه من، دېسه،

اېترمن اونگه هېه فارياپ و بلخ و قوندوزنى.

ياووزنىنگ رېجه سى باعث، اوزاق من سېوگىلى ياردن،

قورېتسىن اۈزى رېيم، تامىرى نېنگ ياو و ياووزنى.

يورەك تاش سۇرمه گه ي مېنىنگ يمان حالېم نى بېر گل هم،

ولى، مېن اېسلب آنى كېچىرور من كېچە - كوندوزنى.

محبت بېرله كۇنگلېم ياره سى گه باسমে دى مرهم،

اته يلب، اۈلسه اۈلسېن دېب ساووردى اوستى گه توزنى.

جمعه. ۱۳. میزان. ۹۷. مېمنه

اۋزبېك شاعرلرى گروھى دە بۇلگن مشاعرە دن.

### سپومەسە ھم مېلى گە...

مېن، اونى جان دن سپورمن، گر رقيبىم بېلسە ھم،

مېربانلىك قىلمەيىن، ھمردم جفالر قىلسە ھم.

اونگە ھرگز آيتمەگە ي دېر من يمان سۇز بېرتە ھم،

گر تېكانلى سۇزلىرى بو قلبىمە سنجىلسە ھم.

سپوسە سپوسىن، باردى مېنى سپومەسە ھم مېلى گە،

مېن، سپورمن كۇزلىرى گە ايلمەسە يا ايلسە ھم.

چونكە، سپودېم بېرتەنى تورگېم توانېم بارىچە،

ايلەمس من بېوفالىك، گر باشىم كېسىلسە ھم.

اوندن اۋزگە ھېچ بېراو گە باغلمەم ھرگز يورەك،

او كېي، آچوندىنە انچە مەلقاء تاپىلسە ھم.

قىتمەگە ي دېر من محبەت يۇلى دن ھېچ بېر زمان،

گر بو يۇلدە باشلرېم گە قىغولر ياغىلسە ھم.

ياكە كۇرسم رنج و محبەت، يا اېشىتىسم طعنەلر،

ياكە جانېم كېتسە و قېرىم چوقور قازىلسە ھم. جمعه. ۲۰. ميزان. ۹۷. مېمە

## نې بۇلدى آنە دياريم؟!؟

تمام بار و يۇقىنگ بۇلدى تالان،

بوتون ابادليگينگ يېر بېرلە يکسان،

باقيب حالينگگە آنگيم قالدى حيران،

سېنگە نې بۇلدى اي آنە دياريم!؟

سېنينگ قۇيينيگ دە خلقينگ قانى آقدى،

قووانيب ياولرينگ قانلرگە باقدى،

بۇليب ياولر يىلان، خلقينگ نى چاقدى،

سېنگە نې بۇلدى اي آنە دياريم!؟

قنى كۆرکم گلستانينگ، نې بۇلدى؟

چېچک سۇلدى، تيکنلر بېرلە تۇلدى،

قرا زاغ کېلدى يو بلبلر اۇلدى،

سېنگە نې بۇلدى اي آنە دياريم!؟

قوريدى كېتىدى دريا و اريغلى،

كۇييب اۇرتندى بوغداى و تريغلى،

الم چېكىدىم كۇريب رنگى سريغلى،

سېن گە نې بۇلدى اي آنە دياريم!؟

اۋكوش كېز بۇلدى قىغولرنى تاتدينگ،

گناھسىز بالەلر قـانى گە باتدينگ،

نېگە بوندە يىمان حالت گە ياتدينگ،

سېن گە نې بۇلدى اي آنە دياريم!؟

ساغيندېم اېسكى دوران و زمانينگ،

ساغيندېم اېسكى آرامش - امانينگ،

ساغيندېم گل گە تۇلگن تۇرت تمانينگ،

سېن گە نې بۇلدى اي آنە دياريم!؟

الم - حسرت كۈپەيدى حددن آشيب،

كۈريب حالينگ يانر كۈنگيل توتاشيب،

ولى، ياوونگ كـولر اۋزىنى قاشيب،

سېن گە نې بۇلدى اي آنە دياريم!؟

شنبه كېچە. ۳۱. سنبلە. ۹۷. ميمنه

اۋزبېك شاعرلرى گروھى دە بۇلگن مشاعرە دن.

### الفت اوروغى

بو ويىران يورتىمىز بۇلگەيمى آباد؟

حزىن كۈنگىللىرىمىز بۇلەمى شاد؟

يوره كلرگە سېپىب الفت اوروغىن،

عداوت خىرمنى بۇلگەيمى برباد؟

بو اېزىلگن اولوس خوشلىكنى كۈرىب،

فلاكت قولى دن بۇلگەيمى آزاد؟

توشىب، تاش كۈنگلىگە بايلرنى شفقت،

غىرىب - بېچارەگە ايلرمى امداد؟

بو ملت بىر - بىراوگە قۇل بېرىشىب،

ياووزلر قىرشى دە بۇلگەيمى امداد؟

بېتىم - بېسىر لىگە كولوگو قۇنىب،

كېترمى؟ يۇق؟ بولردن داد و فرىباد؟

جھالست لشكرى بىر كون كېلىشىب،

سە شنبە اقشام / ۳ / قوس / ۱۳۹۷ مېمنە

تَعَلُّ قولىگە بۇلگەيمى مُنقاد؟

## أینیدى

بو زمان نینگ خاص و عامى أینیدى،

خواجه و دانا - عوامى أینیدى.

قینه مس قــــازانیده رزق حلال،

سفره و نان، سوو و جامى أینیدى.

قیلمه گه ی دیر بی غرض الفتجیلیک،

هم اۋشه بېرگن سلامى أینیدى.

سۈزلسه كۈنگلینگنى یاریب سۈزله گه ی،

اغــــزى دن چیققن كلامى أینیدى.

ابل نى چارله بدى حیاسیزلیک تمان،

بعضى نینگ یازگن پیامى أینیدى.

قنچه قیلسنگ یخشیلیغ بیلمس تنى،

درک و وجدان و مرامى أینیدى.

هم قیلرمن سېوگیلى یاردن گيله،

وا اسفف! ناز و خرامى أینیدى.

قیغو - غم دن لحظه كۈنگلیم تینمه دی،

آه! مېنگه صبح و شامى أینیدى.

۳ شنبه / ۳۰ / سنبله / ۱۳۹۵ میمنه

اوزبېك شاعرلرى گروھى دە بۇلگن مشاعرە دن.

### طرفە مشكل...

رنج و غم دن بو اولوس ايريلمەدى،

دردى گە ھەرگز شفا تاپيلمە دى.

كىنە و كدرت تمان گە چاپدى يو،

دوست و الفتلىك تمان اينتيلمەدى.

اجنبى لىر بىرلە قىزغىن كۈرىشىپ،

بىر - بىراونى كۈزگە اصلا ايلمەدى.

اۋقۇلىك بىرلە حيات كېچىردى يو،

يخشى سۈزلب، يخشى ايشنى قيلمەدى.

طرفە مشكل گە توتىلدى ملتىم،

بو معما ھېچ قچان يېچيلمەدى.

تۇرت تمان دن تېپىلىپ، كلتكى يېپ،

ھېچ اولوس بىزدېك بۇلىپ يىنچيلمەدى.

جمعه . ۲۷ . ميزان . ۹۷ . ميمنه

## ظلمت قالمه گه ی منگو

گلستان ایچره گللرده طـراوت قالمه گه ی منگو،  
بغیرتاش! سېنده هم حُسن و لطافت قالمه گه ی منگو.

اگرچه کېچه و کوندوز غمینگدن آغـو یوتگه یمن،  
بیلیب قۇی مېنده هم بو آه و حسرت قالمه گه ی منگو.

توریب بیر کون مېنینگ بختیم، کولر طالع و اقبالیم،  
چيقر پارلب قویاشیم، قاره - ظلمت قالمه گه ی منگو.

گۈزه للیک سېنگه دولت دیر، چيقرمه مېنى اېسینگدن،  
اگر یاد ایله دینگ، یا یۇق، بو دولت قالمه گه ی منگو.

یوره کنی باغله مه بو نیچه کونلیک جاه و قدرت گه،  
سېنى هم الدهبان بو شان و شوکت قالمه گه ی منگو.

ثروت اهلی! سیزلر هم ثروت بیرله بولغنمگ،  
غریبلرنی هم اېسلنگ، ناز و نعمت قالمه گه ی منگو.

بېگ اۋغلى! تېنگری باردیر، بۇلمه نومیذ باقیب اوضاع گه،  
کۇرسن یخشی کونلرنی، بو محنت قالمه گه ی منگو.

۵ شنبه کېچه. ۱۵. قوس. ۱۳۹۷. میمنه

اۋزبېك شاعرلرى واتساپ گروهيده بۇلگن مشاعره دن

## عشق عِصا ايلهدى

اول يوزى آى مېنگه وای، انچه جفا ايلهدى،

جور يوكى دن بېليم بوكدى - يو يا ايلهدى.

عیش و طرب نعمتین کۆرمهدى مېنگه روا،

قيغو- الم زهرى نى تاتلى غذا ايلهدى.

جور و جفا ترك ايتيب، شفقت و لطف ايله مەى،

ياروغ اچون نى مېنگه، وای، قىرا ايلهدى.

آنگ و هوشيم ذره چه قالمهدى باشيمده هېچ،

تاکه سوزيب کوزينى ناز و ادا ايلهدى.

کيپيرىكى نينگ اۋقى نى مېن سرى ايتيب مدام،

زار تنيم اوزره کؤپ زخم و يىرا ايلهدى.

هجري ده ييغلب تنيم بۇلدى ضعيف اۋيله کيم،

مېنگه قدى يادىنى عشق عِصا ايلهدى.

جمعه- ۱۸- سنبله- ۱۴۰۱ خواجه سبزپوش

اوزبېك شاعرلرى واتساپ گروهیده بؤلگن مشاعره دن

### ناشاد طبع

نېچه مدت دیر قیزيقمس طبع ناشادیم مېنینگ،

دوست و یار و هم قرینداس ایله مس یادیم مېنینگ.

یېتى کؤککه یېتتى کؤنگیل بیرله چېککن آه لیریم،

یېتمه دی لېکن اول آی گه آه و فریادیم مېنینگ.

کېچه - کوندوز کوییده باشیم قویب یاتدیم مدام،

اؤتمه دی باشیم سیلب اول بویى شمشادیم مېنینگ.

مېن، عجیب کؤنگیل بېریب شیرین کبی سېودیم اونى،

او دېمس حالینگ قله ی؟ بېچاره فرهادیم مېنینگ.

عرض حالیم سؤرمه سه دل بیرله سېوگن گلیوزیم،

باشقه کیم اېشیتگوسی بو داد و بېدادیم مېنینگ.

نان یېماق نی ایسته مه م شـعریم بیلن، اما شو بس:

ابل - اولوس گه بېرسه آسغ شعر و ایجادیم مېنینگ.

جمعه - ۲۰ - جوز - ۱۴۰۱ خواجه سبزپوش

## اى چېچك!

بىر كۆريب اى دېك يوزىنگ بۇلدىم گرفتار، اى چېچك!

غصه و غملىرگه هر دم مونس و يار، اى چېچك!

نالە قىلدىم نى كىي هجرىنگده تىنمەي بىر زمان،

حسرتىنگدن هم بۇلىب رسواي بازار اى چېچك!

سرو بۇيىنگ ساغىنىب يىغلب چېكىب درد و الم،

ايكى كۆزىم ياشىنى تۆكتىم گهر بار اى چېچك!

خسته كۆنگلىم دردىگه بۇلمەي دوا اي بي وفا،

ىنگى اىلب دل يراسىن بېردىنگ آزار اى چېچك!

بىر تماندن قهر و جورىنگ بىر تمان ابل طعنهسى،

ايكى يان دن مېن گدانى قىلدى سنگسار اى چېچك!

تاپمەدىم بىر جان كۆير تا شرح حالىم بىرمە بىر،

اىلەسم اېردى اونىنگ آلدیده اظهار اى چېچك!

قالدى بېگ اۇغلى مېنىنگ دردىم دلىمده جابجا،

بولمەدىنگ بىر لحظه مېنگه يار و غمخوار اى چېچك!

۳ شنبه - ۲۲ - قوس - ۱۳۹۰

اؤزبېك شاعرلرى واتساپ گروهیده بؤلگن مشاعره دن

### سېن سېز

بۇلديم الم گه مدفون، اي يوزى آى سېن سېز،

قىلدى الم يوكى آه! بېلېمنى ياي سېن سېز.

سېن بېرله درد و قىيناق بۇلگه ی تېنېم گه تېدىل،

آغو مثالى بۇلگه ی حتى كه چاي سېن سېز.

سېن بېرله قاره تونلر، كونلر گه اؤز گريدى،

كؤزيم گه ياختى دنيا تاپمس چيراي سېن سېز.

سېن بېرله يشنه ماقدن آلگه ی يوره ك حالوت،

اما يشم بلا دور، اي ابر كه تاي سېن سېز.

تون - كون دېمه ی چېكيب آه قيغو يوتيب يورر من،

ياشلا توكيب كؤزيم دن بۇلديم گدای سېن سېز.

وقتیده اېسله گاهى بو خسته زارينگ اي گل!

بېرمىس قرار و تينچليک هېچ بير سراى سېن سېز.

جمعه - ۲۱ - اسد - ۱۴۰۱ - ميمنه

## كاشكى

گل كىي زبىا يوزىنگى كۇرمسە يىدىم كاشكى،  
تېلبە و آشفتە بۇلىپ يورمسە يىدىم كاشكى.

آرزوى وصلىنگ اىلب، خلق ارا تارتىب فغان،  
هر كىشىنى كۇرگانىمدە سۇرمسە يىدىم كاشكى.

اېشىكىنگدە ايكى كۇزىم تېلمىرىب باقىب مدام،  
بىر كۇرەي دېب آى يوزىنگى تورمسە يىدىم كاشكى.

مېن هم عاشقلر قطارىدە بۇلەي دېب، يوز درىغ!  
فتنە دورانده محبت قورمسە يىدىم كاشكى.

خانمان دن آيرى بۇلمەي، فرقىتىنگدە كۇيمەيىن،  
دمبدم باشىمگە مۇستلر اورمسە يىدىم كاشكى.

سېنگە سېوگى باغله بان، كۇنگىلگە قىلدىم مىنگ جفا،  
فرقت اۋتىگە دلىم قاوورمسە يىدىم كاشكى.

اې بېگاۋغلى! آشتى دردىم وادرىغا، وادرىغ!  
اول گۇزەلنى اوزدن آلىس كۇرمسە يىدىم كاشكى.

آشنبە - ۲۱ - قوس - ۱۳۹۰

## اې الله! ج

ابسىز عمرِ عزیزیم نى هدر اؤتكزدیم اې الله (ج)

سېنىنگ بو پروغلىرىنگدن بې خبر اؤتكزدیم اې الله (ج)

نې آچون ایشلرین قیلدیم، نى هم عقبى اوچون تۆشه،

يَشَبَ دنياده وقتیم بــــی ثمر اؤتكزدیم اې الله (ج)

جزا روزیده بيلمس من نېچوک بؤلگه ی مېنىنگ حالیم.

تون و کون آی و ییل نى با ضرر اؤتكزدیم اې الله (ج)

او ساعتدن بو ساعت یخشیراق بؤلسم دېب اؤیلردیم،

بو ساعت نى او ساعت دن بتر اؤتكزدیم اې الله (ج)

کېتىب شیطان ایزیدن خیر و شر نینگ فرقى گه بیتمه ی،

گنه زندانى ده شام و ســــحر اؤتكزدیم اې الله (ج)

بوگون حالیم گه ارزیر بیغله سم اېسلب عزیز عمریم،

نېچوک کیم آلتین ایامیم هدر اؤتكزدیم اې الله (ج)

جمعه ایرته ۲ حمل . ۱۳۹۸ میمنه

## عجب ھنگامە

قرا تۈندە باتىب قالدىك، نېگە آتمەيدى تانگىمىز؟

كۈرۈپ بو فتنە دورانى، عجب جام قالدى آنگىمىز.

بو معنى سىز اوروش باغىت، عياللر بۇلدىلر ببو،

ياغر كۈكۈن توتون - باروت، درختلر بېرمەدى ببو.

شەھىدلرنىنگ جگر بندى، آتمە دېپ اخترىب يورگن،

كۈچە - كۈيلردە اپگىب باش، كۈزىدن ياش آقىب تورگن.

عجب ھنگامە دېر يورتدە، كىشى يۇق عرض حال اېتسىنگ،

باقىب اوضاع گە بېلمە يسىن، باشىنگ آلىب قەيان كېتسىنگ.

وطن ويران، اولوس سىرسان، ھمە اۋز حالىكە حيران،

قووانچدن يۇق اثر ذرە، بېراق غم كولى دېر قىيران.

وطن گە آلتى ياقدن ھم گوويىللىب ياغە دېر آفت،

اپلىمىز غمىرىن اۋتكردى كۈرالمەي ذرە راحت.

الها! بو الم - حسرت، قىچان بېزلىرىنى ترك اېتگەي؟

الم - اورگن اولوس اېندى قچان خوشلىك تمان كېتگەي؟

اۋزىنگ اې مېھرىبان رېيم! سحر قىل قارە تونلرنى،

سېنىنگ لطفىنگگە بېلە اېندى، كۈرەيلىك ياقتى كونلرنى.

۵شېنبە. ۱۰. سىرطان. ۱۴۰۰ مېمنە

ھى ھى نە بلا سن؟

يوز ناز و كىرشمە بىلە جانىم نى آلورسن!

ھى ھى نە بلا سن؟!

مىنگ شۇر و الم فتنەنى كۈنگىلىم گە سالورسن!

ھى ھى نە بلا سن؟!

كېل بىرگە بولىپ، قىسە قىلىپ، يۈلگە يۈرەيلىك،

دوران نى سورەيلىك،

گە تور تىنيان - سور تىنيان آرتدە قالورسن!

ھى ھى نە بلا سن؟!

سۇز سۇزلە گىلىم قالمەدى كۈنگىل دە قارايىم،

اي سېوگىلى ياريىم!

نېگە عىلىم اوشبو غرىبىدن اويالورسن؟

ھى ھى نە بلا سن؟!

بختىم تور بىان كۈچەدە كورسىم گھى سېنى،

سۇكتىنىڭ نېگە مېنى؟

بىر لىحظەدە جن سىنگرى كۇزدن يوقالورسن!

ھى ھى نە بلا سن؟!

خواه قرغە و خواه مقتە و خواه اولدیر ایا گل!

اې اۇرىمى سنبل!

ھر حالده بھانى تۇلە تۇكىس يوز آلورسن!

ھى ھى نە بلا سن؟!

۲شنبه اقشام / ۸/دلو / ۱۳۹۷ ميمنه

## اۋخشەمس

ابندى صبر و طاقتىم، اولگى لرگە اۋخشەمس،

اوشبو وضع و حالتىم، اولگى لرگە اۋخشەمس.

نېچە مدت بۇلدى مېن ھجران مريضى من بېلىنگ،

ساغليگىم ھم صحتىم، اولگى لرگە اۋخشەمس.

دوست و الفت ھم يمان كونلردە يالغيز قۇيگوسى،

دوست و اور تاق، الفتىم، اولگى لرگە اۋخشەمس.

باى بدولت باقمس اپرميش بيز غريب نىنگ حالى گە،

ارزشىم ھم قيمتىم، اولگى لرگە اۋخشەمس.

اۋچدى بېردم دە مېنىنگ باشىم دە گى دولت قوشىم،

ابندى شان و شـــوكتىم، اولگى لرگە اۋخشەمس.

قيغو آرتىق، يۇق قووانچ، كۈزىم دە ياش، كۈنگلىم سېنىق،

تىن دە نىرو قـــوتىم، اولگى لرگە اۋخشەمس.

تار تە - تار تە كېچە كوندوز، آى و بيل غـــم بارىنى،

تۇغەناق دىر قـــامتىم، اولگى لرگە اۋخشەمس.

مېنى آزدىردى لعين شيطان حقيقىت يۈلىدن،

ھم عبادت - طاعتىم، اولگى لرگە اۋخشەمس.

يکشنبه كېچە / ۱۶ / سرطان / ۱۳۹۸ مېمنە

## عجب دنيا سن!

عجب دنيا سن اي دنيا! بيراو گە غم نى مۇل بېردىنگ.

بيراو خۇشلىككە يېتماققە بىر اېمس ايكي قۇل بېردىنگ.

بيراو نىنگ اختىارى دە قىيىب اسباب و آلا تىنگ،

مرا دىنگگە اېرىش دېب هر تماندن اونگە يۇل بېردىنگ.

بيراو گە جاھ ايله قىدرت، بيراو گە دولت و ثروت،

بيراو گە قىسوت بازو بيله ياننى دە رۇل بېردىنگ.

بيراو بىر لقمە نان تاپسىم دېبان هر لحظه سرگردان،

بيراو بىر تامچى سوو زارى، بيراو گە كته كۇل بېردىنگ.

بيراو نىنگ تۇلدىرىپ كۇنگلین فرىبىنگ بىرلە اي غدار!

اخىرى دە اېتىب حىران و نالان ھمدە گۇل بېردىنگ.

ولى هر تور جفا بىرلە مېن بېچارەنى قىيىن،

الم بارىنى آرتىب اوستيمە، كۇزىم گە ھۇل بېردىنگ.

نېگە كۇپ مېنى قىيىنە يسن؟ كفايت قىلمە دېمى ھېچ!

قۇلىنگدن جورە دېم تون - كون، غمىنگنى اونگ و سۇل بېردىنگ.

شنبە اقسام / ۲۵ / جوزا / ۱۳۹۸ مېمنە

لطفى هرولى غزلى گه ابر گشيب....

### قاليشمس

بۇيىنگ سرو خراماندين قاليشمس.

يوزىنگ هم ماه تاباندين قاليشمس.

تيشىنگ دُر سىنگرى بېرگه ی جالار،

جالاسى دُر و مرجاندين قاليشمس.

لبنىگ اولىك تنيم گه بېرگوسى جان،

دوداغىنگ آب حىواندين قاليشمس.

بېرور بويروغ، قاشىنگ قتلىم گه هر كېز،

اونىنگ بويروغى سلطاندين قاليشمس.

كۇزىمدين ياش تۇكر من ياش اوزه ياش،

بو ياشلر قىپقىزىل قاندين قاليشمس.

تنيم نى قمره ب آلدى قىغو - غملر،

بو حالت قلعه - قۇرغاندين قاليشمس.

لبىمده ظاهرا كـولگو دور اما:

بو كولگو آه و افغاندين قاليشمس. شنبه / ۱۸ جدى / ۱۳۹۹ ميمنه

## قىستىنمە اي كۈنگىل!

كۈنگىلىم دە آسرەيمىن، فكر و خىيالىنگىنى.

الله دن ايستەيمىن، ھردم وصالىنگىنى.

سېن دن اوزاق بۇلىسم، آرتر غم و قىغوم،

آچىلگوسى كۈنگىلىم كۇرسىم جىمالينگىنى.

دايم يشىل يورگىن، غم دن بۇلىب آلىس،

تېنگرى دن ايستەيمىن، بخت و كمالىنگىنى.

سۇز سۇزلەگىن جانىم، كۇپ تورمە جىم اپندى،

مشتاقى اپرور من قول و مقالىنگىنى.

قىستىنمە اي كۈنگىل! بۇلگىن چىدەملى سېن،

بىر كون كېلىب سۇرگەي اوضاع و حالىنگىنى.

۲۹ / عقرب / ۱۳۹۸ ميمنه

## عجب دور و زمان

عجب دور و زمان، بۇلدى دوستلرېم!

كۈنكىلردن كېتىدى . آرامش . تېنىم .

قۇللرېنگ بۇش بۇلىپ، بختېنگ ياتسە جېم،

حالېنگى سۇرەمس، ھارمە دەپ ھېچكېم .

قورۇغ سالملر ھەم، سېن دىن ايەلىپ،

سالام بېرسىنگ كېم گە، كېتر دم و سېم .

قدر و قېمتېنگ ھەم، توپراقچە يۇق دېر،

كېسەنگدە بۇلمەسە، باردى زر و سېم .

قۇلىنگ تاش آستى دە قالسە مېادا،

حتى ايناغەنگ ھەم، دەمەگە ي اينېم .

برچە اۋزى يېلىن . مصروف اۋزى گە؛

دوستى گە يېتىشمس، قالدى دەپ ايشېم .

مەنوى بايلىككە، قالمەدى ارزىش،

دىنيا ھېبى بۇلدى، دلە جايلشېم .

بعضيلر آلدېنگچە، جانە جان دۇستېنگ،

اياغېنگگە اورر، آرتېنگ دىن ايلېم .

قېنىچىلىكلرنى، يېچۈچىسى سى سىن،

قېنىچىلىكلرنى، يېچىگىن يا كۈرېم! ۳ئىنبە/ جوزا/ ۱۳۹۹ جمعه بازار

### قىسقىچە عمر

قنچە طى قىلىم غىرىيلىك بۇلىنى.

اۋپمەدېم ھىر سۇقلە - توبن قۇلىنى.

كولمەسىن وضعىم گە باقىب دېب كىشى،

ياشىرىپ اۋتدېم كۈزىم نىنگ ھولىنى.

مىھربان تېنگرىم اۋزى لطف ايلهدى،

بېمەدېم نفس و ھوانىنگ گۈلىنى.

عزتىم بىرلە يورەى سۈۋوسىز دېبان،

ايلمەدېم كۈزىم گە ذلت كۈلىنى.

تېنگرى بىلدىردى بو قىسقىچە غىمىمە،

بعضىلرنىنگ نرخ و عرض و طۈلىنى.

جانكۇبىر بىر يىخشى يۇلداش يۇق سىب،

يىكە گېزدېم ايرىلىق نىنگ چۈلىنى.

شنبە اقشام / ۱۶ قوس / ۱۳۹۸ مىمەنە

## توكلتُ عَلى الله دېب قدم باس

سېنى مقصدگه يېتكيزگه ی تلاشينگ.

پيشر بيركون اېمس، بيركون ده آشينگ.

دَمينگ ده بۇلسه تۇسويق قَيْغو يوتمه،

اولوغ تېنگرى اۇزى دير ارقه داشينگ.

توكلت على الله دېب قدم باس!

قالر تاغ آرتده، گر ساغ بۇلسه باشينگ.

غم دنيا اوچون ياش قيلمه كۇزينگ،

غم عۇبى اوچون قيل جارى ياشينگ.

قـبول قيلگه ی عباداتينگ نى الله،

حلال يۇلدن كېتيرسنگ گر معاشينگ.

اۇزينگه پيشه قيل صبر و متانت،

باقر سېن سارى بيركون بغرى تاشينگ.

۲ شنبه / ۱۱ / قوس / ۱۳۹۸ ميمنه

## بو اولوس تورگە ي مى، يۇق؟

غفلت اويقوسىدە ياتگن بو اولوس تورگە ي مى، يۇق؟

بابە و اجدادى ينگلىغ — مستقل يورگە ي مى، يۇق؟

ارسلان دېك باشقەلر نىنگ شرى نى دفع ايله بان،

بې حيا باسقىنچى لرنى تىپەلب سورگە ي مى، يۇق؟

اورتەلردن تارتىشوو لرنى اپتېب محو و عدم،

وحدت و بىرلىگى نىنگ تعمىرىنى قورگە ي مى، يۇق؟

آنگ و هوش دن ايش آلب، خنى اپتېب ياو رېجەسىن،

ياولرى نىنگ كۈنگلىنى حسرت گە قاوورگە ي مى، يۇق؟

بو بلا — آفت دن اۋزىن قوتقەرىب، هوشيار اۋلب،

بىر — بىراوگە شفقت و حرمتنى ساوورگە ي مى، يۇق؟

اې عزيزلر! لطف اپتېب يازىنگ سوالىم گە جواب:

بو اولوس هم بابەلردېك مستقل يورگە ي مى، يۇق؟

شنبه / ۹ / سرطان / ۱۳۹۷ ميمنه

## اۈزبېگىم!

اۈزىنگ اۈز دردېنگگە تاپگىن اېندى درمان اۈزبېگىم!

اۈزگە درمانگرگە باقىب ياتمە ——— يىران اۈزبېگىم!

اۈزگە درمانگر سېنىڭ دردېنگى درمان ايلەمس،

آشېرىب دردېنگ نى قىلگەي زار و نالان اۈزبېگىم!

باقە \_ باقە اۈزگە درمانگر گە ——— اۈز اۈزبېگىم،

اېندى قۇزغىل، ياتمە نالان، ايلە جـولان اۈزبېگىم!

ايرىلىق دردېنگ نى كۇرسىم غم يوتىب، تىنمەي مدام،

خاطرېم ناشاد اۈلىب، بىرىم قىزىل قان اۈزبېگىم!

ياۈگە تۇلدېرمە يۈرەك، ياۈ سېن گە دوستلىك ايلەمس،

اوشىبو سۇزېم ئابىت اېتدى دور دوران اۈزبېگىم!

يۇلدىن آزگن خلىق اېمسىن، چىن بو سۇزېم راپە راست،

سېن مىسلمان، سېن حىقىقى صاحب \_ ايمان اۈزبېگىم!

آتە \_ بابانگ كىم اېدى تارىخ نى بىر قىلگىن مرور،

اۈتمىشىنگ بىل! ھمدە بولگىن تىتى اۈغلان اۈزبېگىم!

سېن اۈزىنگ دن باخىرسن مى؟ و يا كە بې خىر؟

بىلمەسنگ بىلگىن، اۇزىنگ سن خان و خاقان اۇزبېگىم!

سېن گە بار اېرکن عـجايىب ات قازانگن جدلرىنگ،

علم و حکمت صاحىبى، کامل - مسلمان اۇزبېگىم!

كۆكسى گە ايمان نى تاشىب، سومنات نى قىلدى فتح،

حضرتِ محمود غزنەنگ شېر غُران اۇزبېگىم!

تېمور صاحبقران بابانگ نى تانىيسن مى؟ يۇق؟

تن بېرىب اېللر دېگە ي لر: مـرد ميدان اۇزبېگىم!

تۇغـرل و سنجر بابالردن اۇگيت اَلگىن بوگون،

چىقمەسېن اېسدن ملك شاه - اَلپ ارسلان اۇزبېگىم!!

كۆرەگانى جدولين سازلب اولوغ بابانگ ينه،

قىلدى يولدوزلرنى سېرىن خلققە تىيان اۇزبېگىم!

بايقرا و بابر و شاهـرخ و باشقەرگە هـم،

فخر قىلىسم ارزىگە ي، اې نسل تـوران اۇزبېگىم!

مىرعلى شېر نوايى كـۇپ اثرلر قالدېرىب،

پنجه تشلب خمسه گە هـم يازدى دېوان اۇزبېگىم!

هم محمد خان شىيانى عـجىب پادشاه اېدى،

نامى تارىخلردە قالگن منگو - داسستان اۋزبېگىم!

مرغىنانى - البخارى - ترمذى - خوارزميلر،

ابن سينا - الفرابى سېنگە دىر شان اۋزبېگىم!

قىسى بابانگدن توتە ي ات؟ قىسى سى اېسىم دە دىر؟

يۇق اېسىم اۋرنى دە فعلا ھىم پرىشان اۋزبېگىم!

اتە - بابانگ چىن يورە كدن اېردى قرآن خادمى،

چىن يورە ك دن بۇل سېنم منقاد قرآن اۋزبېگىم!

سېن، خدا گە تۇغرى بندە بۇل، خدا توزگە ي ايشىنگ،

بۇلمەگندە، سېنى خوار ايلەيدى شىيطان اۋزبېگىم!

باغ بابر، تاج محل، ھىم مىنگدن اړتېق ابدات،

قالگن اجداددن، تمدن گە بو برھان اۋزبېگىم!

سېن تمدنچى اولوس سن، سېن سياستچى اولوس،

سېن عمارتچى اولوس سن، يىخشى دەقان اۋزبېگىم!

سېن عجىب زحمت سېورسن، زحمتىنگدن ناننى يېب،

هە! بىلورمن ھېچ يېمس سن، سېن تېكىن نان اۋزبېگىم!

طىنتىنگ پاك، فطرتىنگ صاف ھمدە كۈنگلىنگ تىب تىنىق،

برچە گە بىردېك قىلور سن مەر و احسان اۋزبېگىم!  
 سېن عقللى سن، فراست ھمدە حكمت عاشقى،  
 چىست و چابك، فهمى اۋتكىر، اسرو چققان اۋزبېگىم!  
 عقل و منطق دن ايش آگىن، دوست ايله دشمن نى بىل!  
 بېرمەسېن سېنگە فرىب هر شكلى انسان اۋزبېگىم!  
 آنە توركستان نى اېندى قېتەدن قورماق كېرەك،  
 بىر- بىراو گە قۇل بېرىب قىل ياو نى سرسان اۋزبېگىم!  
 بې حىيا دشمن لرېنگ سۈزى گە اېلب اعتماد،  
 تېنچلىگىنگ قۇل دن بېرىب، يورت قىلمە ويران اۋزبېگىم!  
 اېندى تېرغىز اېسكى شوكت، اېسكى شانېنگ، اېسكى نام،  
 باغله بېلىنگ! كىي تۈنىنگنى، ايله طوفان اۋزبېگىم!  
 اۋتدى غفلت نېنگ زمانى، اويغانىش وقتى بو دم،  
 كۈز اچىب تورگىن اياققە، عصر امكان اۋزبېگىم!  
 بىر- بىراوگە قۇل بېرىب بىرلشمەسنگ، قىلسنگ نفاق،  
 ياو سىنى يېنگىب قىلر بېر بىرلە يكسان اۋزبېگىم!  
 ياتمە غفلت ھم جھالست دېنگىزى دە تۇلقىنىب،

باردى ياتسنگ، سېنى، تارىخ دېيدى بېسان، اۋزبېگىم!  
 بس دە اېندى، بور كىنىب، كۈپ اغير اوخلب ياتمەگىن،  
 تور فلاكت اويقى دن، كېتماق دە کروان اۋزبېگىم!  
 سېن كورەش ميدانى گە كىر! بشقەلرگە يۇق اۋرىن،  
 مرد ميدان سېن اۋزىنگ سىن ھمدە پلوان اۋزبېگىم!  
 سېن اۋزىنگنى سقلەگىن، ياولرگە ھەرگىز بېرمە يۇل!  
 ياوگە يۇل بېرسنگ قىلر بىر دم دە تالان اۋزبېگىم!  
 تېنگرى سېنى خۇر يره تگن، خۇر يشە! اېركىن يشە!  
 خۇر يره تگە ايله گىن بارىنگنى قىربان اۋزبېگىم!  
 سېن طفىلى قنچەلر يېتىدى مقام و جاھ گە،  
 چوكى و قدرت گە يېتىگچ، قىلدى طغيان، اۋزبېگىم!  
 بعضى نامرد اېل سېنىنگ حقىنگگە قىلدى كۈپ جفا،  
 شو سبب دن انچه چېكىدىنگ آه و افغان اۋزبېگىم!  
 سېن يوتوقنى ايستەسنگ باردى بوگون باتير اولوس!  
 تاخته محكم، باغله ينگى عھد و پيمان اۋزبېگىم!  
 ھەر بىر اولادىنگ بەھادر - قەرمان ھم داو يورەك،

قىزلىرىنگ حور و ېرى دېك كۈزى جىران اۋزبېگىم!  
 وه! عجب ېېر، سېن دە بار دېر، آتى توركـستان ديار،  
 ېم ېشىل تورگن همېشه باغ و بوسـتان اۋزبېگىم!  
 آتە ـ بابالىك وطن دېر سېن دە توركـستانى مېز،  
 كېم هجوم قىلگندە قىل! قانىنى قىران اۋزبېگىم!  
 مېرېان سن هم عطوفت صاحىبى، كۈنگلىنگ تىنىق،  
 مېن، گۈزەل خويىنگگە باقىب قالگىم جىران اۋزبېگىم!  
 سېن، شو وقتگە چە ياووز-ياولرگە بۈيىنىنگ اېگمە دىنگ،  
 اېندى كە هېچ اېگمە گە ېسن، كۈكسى قلقان اۋزبېگىم!  
 شكرلله! مېن مسلمان ـ تورك اولوس فرزندى من،  
 فخر اېترمن قىتە ـ قىتە كۈكسىم آسمان اۋزبېگىم!  
 چىقمە گە ي اېس دن بشرگە ايلەگن خـدمتلىرىنگ،  
 قە ي تمان باقسىم كۈرر من شعلە افشان اۋزبېگىم!  
 تا قىامت شېرتىنگ، شېرت كۈكى دن توشمە سېن،  
 شوندى ېين قىلدىم دعا مېن، اى بىلىم دان اۋزبېگىم!  
 بى و يا و گاف ـ الف و واو و غىن و لام و يا،  
 بو قـسىدە سىنگە يازدى قىل قبول جان اۋزبېگىم!

۴ شنبە / ۲۸ / سرطان / ۱۳۹۶ / مېمىنە /

## مهرسیزدن یۇق درک

لحظه لر کبتدی یو کبلمدی،

همده ساعتلر شونینگدېک،

تون و کون هم کبتدی، کبلمدی،

هفته لر اۋتدی یو کبلمدی،

آی و بیل هم عین شوندېک...

ای قلم قاش! بغری تاشیم!

آقدی کۈزدن انچه باشیم،

لحظه لر کوتدیم سېنى ساعتگه باقیب،

ساعت اۋتدی، کونگه باقدیم،

کوندوز اۋتدی، هفته و آیلرگه باقدیم،

قنچه آیلر اۋتدی کبتدی،

تېرمولیب بیللرگه باقدیم،

بیللر اۋتدی، عمریم اۋتدی...

سېن جفاچی، کۈنگلی قتیغ،

مهرسیزدن یۇق درک.

۴ شنبه تون / ۴/میزان / ۹۷/میمنه

مېن سېۋه من ...

گرچه بېر گل الده دېنگ،

بېر مرته هم اچىقله دېنگ،

بېر مرته هم قرغب مېنى سۈك دېنگ يمان!

بېر اېمس، مېنگ الده سېنگ،

سۈك سېنگ و يا

خور تېنگله سېنگ،

مېن، سېنگه دالضرب اگر هم بۆلمه سم، اې سېۋگېلىم!

مېن، بېلرسن مى؟ سېن گه نې ايلهرم؟

مېن، سېنگه سېۋگېم نې جۈشقىن ايلهرم!

سېن، مېنگه دالضرب اېرور سن،

مېن، وفا قېلگېم سېنگه،

مېن، كولىب باققېم سېنگه!

چونكه:

مېن، اسلام گه ايزداس، همده اۋزېپك باله من،

سېنگه قېلگن عه دېم اسرو - كۈپ چمېرچس اېرور،

قېتمه گه يمن اوشو چمېرچس عه دېم دن تنى،

قېته - قېته، مېن، سېنى جانېم بېله كۈپ سېۋه من! جمعه / ۶ / اسد / ۱۳۹۶ / جمعه بازار

### بالەلىك ايامىنى اېسلىب...

قەي دن تاپەي سېنى، مېن، بالەلىگىم؟

مېنى تشلىب كېتىدىنك سېن بالەلىگىم!

سۈزىم يالغان اېمس، چىن، بالەلىگىم!

كۈنگلىم غمىن و — زىن بالەلىگىم!

بالەلىك ايامى نېگە تېز كېتىدىنك؟

ساغىندىم مېن اېسكى دور و چاغلرنى،

ساغىندىم مېن ايسكى باغ — چىر باغلرنى،

ساغىندىم مېن كنه ادير — تاغلرنى،

ساغىندىم مېن كۈنگلى صاف اور تاغلرنى،

بالەلىك ايامى نېگە تېز كېتىدىنك؟

قنى دۈستلر بىلن كولىب يورگنىم؟

قنى دوستلر بىلن مجلس قورگنىم؟

قنى خوش و خندان بۇلىب يورگنىم؟

قنى چىللك، توشلە — اشىق اورگنىم؟

بالەلىك ايامى نېگە تېز كېتىدىنك؟

تال خىمچەدن آنچه توزىب يورردىك،

سوغدى دە تۈپلەنىب گجە اورردىك،

ه — تورلى گپورىب، تۈيىب كولردىك،

قىغو — غم دن ايس دوران سورردىك،

بالەلىك ايامى نېگە تېز كېتىدىنك؟

كْتە بۇلىيب بۇلديم آتەمدن اوزاغ،  
ھىم عزیز - مهربان آنەم دن بيراغ،  
شوباعىدن كۇنگلیم ابرور داغ - داغ،  
استە - استە آلدیم دنيا دن ساغ،  
بالەلىك ایامى نېگە تېز كېتىدىنگ؟

كېلرمى قېتەدن او اېسكى ایام؟  
بۇلرمى بېزگە غملىر تابع و رام؟  
تانگاتیب، ياخشى بۇلگەیمى قرا شام؟  
دمیم دن یوقالیب كېنگەیمى شوم دام؟  
بالەلىك ایامى نېگە تېز كېتىدىنگ؟

كىمگە دېيە ى كۇنگلیم دەگى سۇزیمنى؟  
السى ياشسى قمرەب آلگن كۇزیمنى.  
أه چىكىب اوتكزدیم بیل - آى، رۇزیمنى.  
اېندى تىپنگریم گە تاپشیردیم اۇزیمنى.  
بالەلىك ایامى نېگە تېز كېتىدىنگ؟  
۴شنبه / ۱۹ / سنبله / ۱۳۹۹ یمینە


## يارب!

قىيىنچىلىكلار نىنگ بېچۈچى يارب!

قىيىنچىلىگىم نى اۈزىنگ اېندى بېچ.

يازىق - خىطالرنىنگ كېچۈچى يارب!

يازىق - خىطايىمنى اۈزىنگ اېندى كېچ.




اميد كـۈزىم اوزدىم اېل و اولوس دن،

اميد كـۈزىم تىكدىم اۈزىنگه يالغىز.

قـۈيمه مېنى يالغىز، قـۈلىمنى اوشله،

جرمىم نىنگ اوستى گه بخشش خىلن چىز.



كولگو كۈتارىش گه يۇق دېر تحمل،


كولدىرمه اوستىم گه ياو و سيال نى.

باشىم ده سقلەب من تورلى خىياللر،

حقيقت - تۇغرى گه اۈزگر خيال نى.



اۋزىنگدن اۋزگە گە ابلگيم اوزەتمە،  
 اۋزىنگگە اوزەتگين ابلگيم نى يارب!  
 مېن بيلن بۇلىب تور، يۇق اېسە، مېنىنگ -  
 تشويش - الم آلكەي كۇنگليمنى قمرەب.



قنچە ياقىملى دير، قنچە اۋنىملى،  
 سېن بيلە سۈزلىشىش، سېن بيلە بۇلىش.  
 سېنى اېسلەمسدن وقت نى اۋتكزىش،  
 اۋلىمدن انچە وقت ايلگرى اۋلىش.

اشنبە - ۱۰ - جدى - ۱۳۹۶ - ميمنه

### اۋكسىنمه آنه تىلیم!

اۋكسىنمه، ای آنه تىلیم، اۋكسىنمه!

سېن كمبغل اېمس، سېن جوده باى سن.

سېن قرانغو اېمس، سېن كوچسيز اېمس،

سېن چىراى كۈكى ده يارىگن آى سن.

باشقه لر، باشقه تىل گه يازه وېرسىن،

مېن سېنگه يازه من، سېنى سېوه من.

باشقه لر، باشقه تىللرنى مخته سىن،

بو ايش دن نازه من، سېنى سېوه من.

اۋكسىنمه گىن تويغو سىز باله لردن،

تويغولى - احساسلى بالهنگ هم بار دىر.

سېنگه يازىب، سېنگه اۋقىب يورىگن،

بىر كون اۋقىمه گنده بې قىرار دىر.

اۋكسىنمه، ای آنه تىلیم، اۋكسىنمه!

سېنى اونوتگنلر اونوته وېرسىن.

مېن، سېنى اونوتمه هم هرگز ده هرگز،

باشقه لر قه ی گه كېتسه كېتبه بېرسىن.

كۈنگلىم تۈلىب، مونگلى يازوويم بىلە،  
 ايچكى حس - تويغومنى عيان ايتدويم، مېن.  
 بىلر، بىلمس قىلىب، شونەقە يازدويم،  
 آنە تىلېم سېوگىم نى مېن، سېن اوچىن.  
 ۲ شنبە آقشام / ۱۳ / حمل / ۱۳۹۷ / مېمنە شېرى

### كۈرمە ي كېتسىن....

كۈرمە ي كېتسىن سۇفلە كىشىلر مقام،  
 كۈرگندە، قاپگە ي دىر سېنى، ايت بۇلىب.  
 آلدىن بارسنگ دە تىشلىب اېشك دېك،  
 تېپر، آرقەسىدن بارسىنگ دل تۈلىب.



كۈرمە ي كېتسىن بدذات - سفلىر مقام،  
 كۈرگندە، اينىدى بلچىغ دن يمان.  
 كۈرمە ي كېتسىن كىنىس - خسىلر مقام،  
 ايشىنگ توشسە قىلر رنگىنگنى سمان.



كۈرمە ي كېتسىن كئىف - بد اصل مقام،  
 كۈرگندە، قرەمس هرگزدە بېرگە.

يېتمه ی كېتسین يېلپىغچلر مــــقام گه،  
كمزۇر نى تېپىب، پــــكّه اورر زۇرگه.



كۇرمه ی كېتسین جاهل - احمقلر مقام،  
كۇرگنده، اولوس نــــى نالان اپتر، زار.  
يېتمه ی كېتسین كۇرمه گنلر مــــقام گه،  
يېتگنده، اولــــوس نى برباد اپتر، خوار.



يېتمه ی كېتسین نىتى بد، مــــقام گه،  
يېتگنده، اولــــوس نى ساتر قيران گه.  
اولوس نینگ اوستى گه آر تيب مصيبت،  
بېلى نى اۋخشه تر ياي و كــــمان گه.



يېتمه ی كېتسین يره مس لر مــــقام گه،  
يېتگنده، اېل - يورت نى يره لى قىلر.  
اياغ اــــستى اپ تيب تو يغو - غايه نى،  
شيره لى جا يلر گه بار يىب اــــسىلر.

۴ شنبه كېچە / ۹ / جۈز ۱ / ۱۳۹۷ مېمنه

## اېركىنلىك

بىزنى، اولسوغ تېنگرى اېركىن برە تگن،  
بندە گە قسول بۇلىب، ياتىشگە اېمس.  
باشىنگى كۈترگىن اېركىن يشە گىن،  
اصالت - كىملىگىنگ سساتىشگە اېمس.

اېركىنلىك كىشى گە عزت و شان دىر،  
اېركىنلىگى يۇق خلقلر بې نشان دىر.  
اېركىن سىز اولوس نىنگ قىمتى بۇلمس،  
ايگى يوزىن رنگى دايم سسمان دىر.

اسارت - برده لىك ذلت ياغسدىر،  
شو اوچسون يامان دىر اسارت هر آن.  
اسارت كىشنىن سىندىرىنگ قسۇلدن،  
بو ايش اوچسون ايلهنگ جدل هر زمان.

بابا - اجدادىمىز اېركىن يشب دىر،  
باسقىنچى - ظالم نىنگ تۇسىب يۇلىنى.  
عيش و عشرتى نى مساتم قىلىبان،  
كىشنگ گە ماس اىلب ايگى قۇلىنى.

بىزلرهم دايم اېركىن يشە يمىز،  
بابا - اجدادىزىمىزنى اۋرنك اىلب.  
بىز گە قصد اېنگن نىنگ قولىنى اوشلب،  
بۇنىنى اېگرمىز، كىشنگلر سسالىب.

۲۲/ اسد/ ۱۳۹۸ خواجه سبىزپوش

## يخشىليغ

گر قۇلېنگدن كېلسە قىلگىن يخشىليغ،  
نادم اېرمىس يخشىليغ قىلگن كىشى.

ياز ايسىق، قىش سووق دېب يوتمە غم،  
نې زمان نېنگ يازى قالگەي، نې قىشى.

غىجە قىلسە كىم غرىبلرنى بوگون،  
اېرتەلىكدە سېنگوسى حتما تىشى.

بعضىلر اورگەي عدالست لافىنى،  
لىك مدام كۇرسنگ خىانت دور ايشى.

ألغى - ساتغى دىن و ملت اوستى گە،  
بېللى اېرمىس اۋزلىرىن كىملىك - كىشى.

بعضى بىر تېررانچە قىلگەي غر و پىش،  
تىش لىرىم گزگزلە تر غر و پىشى.

بې وفا دنيا، عجب دنيا اېكن...  
دايما مظلوم گە اۋتگزدى نىشى.

بعضى دوستلر هم عجايب دوست اېرور،  
تېپگوسى دۋستىن اگر بېتسە ايشى.

توت اۋزىنگنى تىك، شكايست ايله مە،

قالمەگەي ھېچكىم نى دايم مېش - مېشى. جمعه - ۱۹ - قوس - ۹۵ - خواجه سبىز پوش

## تضمين

ميوەلردن المە و شفتالو تاتلى راق ولى،  
مزەلى يازىشدا توركانە تكلەم دىر گۈزەل.

ھەمدە فاريايى

نازىنلار ھەر رەقەم كۈلسە ياقر عشاقى گە،  
آيتەن يارىم گە بىل: مېنگە تېسىم دىر گۈزەل.

قرغە دېك قەقەلمە، سىراقى قوش دېك سىرەگىن،

چىرقىرەب، بېغەلەن دىن خوش ترنەم دىر گۈزەل.

پۇلتى - سۇلتى گېگە دۈستلەر كۈنگىلىنى اينجىتمەگىن،

يار و دۈست گە بىل مدام يىخشى تۆھمەم دىر گۈزەل.

يارنى قىلگەن جورىنى ھەركىم گە آيتگەن دىن كۈرە:

بارىيان اۋز آلدى گە قىلگەن تېلىم دىر گۈزەل.

جىم جىرىت - مىق اېتمەسى تورماق اۋزى يىخشى اېمس،

شەرگە تابىنگ بۇلمەسە، نېلىم آيت، تېلىم دىر گۈزەل.

اۋقىمىلىك اېنگ يمان - قۇپال قىلىغ دىر بىل مونى،

اۋقى! بۇلسە تىندە جان، اوقىش - تېلىم دىر گۈزەل.

قۇت و زۇرىنگ كۇرىب قىلمە غرىبەرگە جفا،

باش سىلب، قىلگىن تېرىم، شو تېرىم دىر گۈزەل.

ھەركىشى گە آنە - سىنگىل بۇلگوسى بىلسىنگ اگر،

ناموس و عار حرمتىن تونگىن، تحرم دىر گۈزەل.

جامەنگە باردى ترقلسە فواحش اې عــــزىز!

كوچلەنىب اوشبو كسل، قىلسىنگ تحرم دىر گۈزەل.

تېنگرى بېرگن نعمتىن يىب، تابوغى دە باشىنگ اېگ،

حق يۇلى دە قۇل - اياق قىلسە تورم دىر گۈزەل.

اشنبە - ۱ - حوت . ۱۳۹۵ . مىمنە.

## مشوى

هرخس و خاشاككه باش اېگماق خطا،

هر كئيف - ناپاككه باش اېگماق خطا.

هر رقم ناكسس گە راز ايتيش خطا،

كيم شو ايش قىلسە قىلر اۈزگە جـفا.

هر رقم ناكس نينگ اوستى گە سەنەش،

در حقيقت زهر قاتل دن يله ش.

هر رقم ناكس گە كۈنگىل تۈلدىرىش،

اۈزنى اۈلمس دن تورىبان اۈلـدىرىش.

مىن كه شـوندەى اۈيله ديم اۈرتاق لريم!

راز دل نى سـۈيله ديم اۈرتاق لريم!

سوچچە اۈزى گە تيه نماق دور كبرەك،

چونكه اوندىن اۈزگە سى قورروق تبرەك.

(حسبى الله) دېگىن اۈزى بىرلە بۇل!

هر رقم ناكس لە دن يوو يوز و قۇل.

سـېن بيله بۇلسە اگر پروردگار،

ايكى اچوندە بۇلرسن با وقـار.

سـېن بيله گر بۇلمەسە پروردگار،

برچە عـالم لە بۇلرسن بې وقار.

اي خـدايىم غم نى ھەدم قىلمەگىن،

گردنىم نى اۈزگە گە خـم قىلمەگىن.

بىر كـمىنە قـلگىننگ مـن كـيچ اۈزىنگ!

۲ شنبه - ۱۱ - اسد - ۱۳۹۵ ميمنه

كـيچ اۈزىنگ سن، كـيچ اۈزىنگ سن، كـيچ اۈزىنگ!

### هویدا غزلى گه مخمس

نېله يين عصيان سبب دن سىندى كيم باليم مېنينگ،  
 بۇلدى ابل نينگ غيبتى دايم قيل و قاليم مېنينگ.  
 زشت و بد دور تۇغرى ايتسم برچه اعماليم مېنينگ.  
 (رۇز محشر ده خــــدايا نه كېچر حاليم مېنينگ؟  
 ضايع اۋتتى بې خبرليكه ده و ساليم مېنينگ)



قىلمه ديم كار روا نى بىر خــــــضور دل بيله،  
 ايتمه ديم حمد و ثناء نى بىر خــــــضور دل بيله.  
 ايتمه ديم تركِ خطا نى بىر خــــــضور دل بيله.  
 (قىلمه ديم ذكر خدا نى بىر خــــــضور دل بيله،  
 معصيت يۇليده اۋتتى دايم حاليــــم مېنينگ)



ايله ديم شيطان و نفيــــم خــــواھشاتين دايم،  
 كېلمه دى ياديمغه بىردم دوزخ و يوم الجــــزا.  
 غرق بۇلديم بحر عصيان غه مېن بخت قــــرا.  
 ( اوشبو حال ايله اۋليب كېتسم قرانغو گــــور ارا،  
 كيرسه اول ايگى ملايك سۇرسه افعاليم مېنينگ)



برچه كاريم بۇلسه شَر و بۇلمهسه خيِر و صواب،  
 اونده گر رحم اېتمه سنگ باشيمغه بۇلگه ی دور تُراب.  
 هېچ توگنمس نارِ سۇزان بې عدد دور هم عتاب.  
 (رييم الله دېب اونگه بېرگيم نه يوز بېرله جواب،  
 بۇلمهسه آلدیمغه اول دم يخشی اعماليم مېنينگ)



ايله گيل لطف و ترحم اول دم اۋزينگ ای وهاب!  
 گرچه قیلدیم جرم وعصيان بېرله طغيان بې حساب.  
 ايله گه ی دور من اميد مېندن اوزاق توتسنگ عذاب.  
 (آه اۋشل ايگى ملک تورسه غضب بېرله قراب،  
 نې بۇلور ای دوستلر اولدمده احواليم مېنينگ)

اۋتتى بيللر قيلمه ديم تېنگرى اوچون كۈزيمنى نم.  
 مال و دولت دېب وليكن قنچه چېكديم رنج و غم.  
 قيلمهسه شفقت بېگ اۋغلى اۋزى بېر قادر اېگم.  
 (ای هویدا بۇلمهسه گر اۋزى دن لطف و كرم،  
 اېل ارا مشهور دور بو زشت افعاليم مېنينگ)

جمعه - ۱۰ - سنبله - ۱۳۹۱

## فراق شَمە سى

ابسىم گە توشدىنگ اي آب زلاليم!

شىيرين سۈز بلبليم، دلده مجاليم!

كىشى يۇق سۈرسە مېنىنگ وضع و حاليم،

اوزاق كېتىدىنگ بوگون مېن دن غزاليم!

خىيال بۇلدى سېنىنگ بيرلن يوريشيم،

ينه سېن بيرلە مجلس نى قـوريشيم.

بۇليب مغرور بو كۈكسىم گە اوريشيم،

خىيال بۇلدى، توشيم بۇلدى خىيالىم.

عجب قىلگەي اېدىنگ، اي گل تبسم،

قىلر اېردىنگ عجب فاريم ترنم.

او وقتلر كـۈزيم آلدیده تجسم.

او وقتلر قېردە كېتىدى آى جـماليم!؟

بياللمەم كيم نى دلدارى بۇلور سن؟

بياللمەم كيم نى گلـزارى بۇلور سن؟

بياللمەم كيم نى يـارى بۇلور سن؟

سلامت يشنه گين قاشى هـلاليم!

چېكر من درد فـرقت گاه و بېگاہ،

كيشى يۇق قىلسه بو وضعيم تماشاھ

فراق دردى عجب آغير اپكن آه!

خيالينگ بۇلدى اي واي قىل و قاليم!

عجب دوران اپكن سبن گه قره شلر،

يوزينگ كۇرماق اوچون سېكين مره شلر.

ييلان اوزيم لرينگ آچيب تره شلر.

نې بۇلدى طالعيم؟ بختيم؟ جالالم؟

وصالينگ قدرى نى بيلمس اپكن من،

فراق دن مېن گه اينگن يۇق اپكن سن.

اوريب باش گه قيله ي شكوه فراق دن.

ابشيتمس كيمسه آھيم، بر كماليم!

ييلرسن مى؟ غريبينگ واله بۇلگه ي،

ھميشه اپندى كارى ناله بۇلگه ي.

كـۇزى دن ياشلر آقيب ژاله بۇلگه ي.

ديگه ي دير غم ده اوتگه ي ماه و سالييم.

عجب آغير اپرور افكار فرقت.

عجب بيمار اپكن بيمار فرقت.

كيشى گه آرتمه يا رب! بار فرقت.



## يمان خېر

خۇشلىگىم بۇلدى بوگ—ون زېر و زېر.  
درد دل اۋلمەي دوا، بـۇلدى بتر.  
اوستيمه هـر لحظه غم لشكر ييغر.  
بیر يمان سۆز كېلدى سېن دن اي جگر!



يۈلېنگ اوزره اينتقيقب تورگن لريم،  
كېچەلر ييغلب فغان قورگن لريم،  
اۈزدن اۈزگه كۈكسيمه اورگن لريم.  
برچه سى كېتدى هدر، كېتدى هدر.



تورلى قالبلرده شـعر يازيش لريم،  
همده فرهاد دېك جبل قازيش لريم،  
سـېن اوچون اچيقيقه و سازيش لريم.  
برچه سى دن ذره كـۈر ماديم ثمر.



كۈنلگيمه مينگلر اميد قىلگن لريم،  
كۈيه -كۈيه هـم يورهك تىلگن لريم،

سېنى دردىم گە طـــــــيب بېلگن لريم،  
كۆيدى، كول بۇلدى، بولر قيلمە ي اثر.



قېتەدن اۇلدى غريب كۈنگلېم مېنىڭ.  
گل كې سۇلدى غريب كۈنگلېم مېنىڭ.  
قيغودن تۇلدى غريب كۈنگلېم مېنىڭ.  
هە! هە! بو اچون دە تورماغيم خـــــــطر.



سېوگىنگ آلگن جاي يوره ك نىنگ تۇرى دن.  
اويقو يۇق دور اشـــــــتياقېنگ زۇرى دن.  
شـــــــكوهلر ايله ي بو بخـــــــتيم شۇرى دن.  
بېلمەدېم بو تابكـــــــى اـــــــغـــــــير ياتر؟



گرچه مېن بۇلدىم الـــــــم نىنگ توتقىنى،  
ايرولـــــــيق نىنگ دردى قىيىنە ي دى مېنى.  
ايله سين غم دن اوزاق رېيم ســـــــېنى.  
مېن كە سۇلدىم، يشنە سېن شاداب و تر.  
جمعه. ۲۳. دلو. ۱۳۹۵. جمعه بازار.

اۋزبېك اېمس ايشاتىنگ!

اۋزبېك بۇلىب، اۋزبېك—چە يازالمەسە،

اۋزبېك بۇلىب، اۋزبېكچە سۆزلالمەسە،

اۋزبېك بۇلىب، اۋزبېكچە تورالمەسە—

اۋزبېك اېمس، اۋزبېك اېمس، ايشاتىنگ!

اۋزبېك بۇلىب، اۋزبېك گە تورمەسە،

اۋزبېك بۇلىب، حق تمان گە يورمەسە،

اۋزبېك بۇلىب، اېركىن دوران سورمەسە،

اۋزبېك اېمس، اۋزبېك اېمس، ايشاتىنگ!

اۋزبېك بۇلىب، كېملىگىنى بىلمەسە،

اۋزبېك بۇلىب، گل كىبى آچىلمەسە،

اۋزبېك بۇلىب، يىخشى ايشنى قىلمەسە،

اۋزبېك اېمس، اۋزبېك اېمس، ايشاتىنگ!

اۋزبېك بۇلىب، اۋتمىشىنى اونوتسە،

اۋزبېك بۇلىب، اۋزى يۇلىنى توتسە،

دشمنى دن يىخشى نىتىجە كوتسە،

اۋزبېك اېمس، اۋزبېك اېمس، ايشاتىنگ!

اۋزبېك بۇلىب، ياوگە اۋزىنى ساتسە،

اۋزبېك بۇلىب، چققە گناھ گە باتسە،

اۋزبېك بۇلىب، اۋزى گە اۋقنى آتسە،

اۋزبېك اېمس، اۋزبېك اېمس، ايشاتىنگ!

اۋزبېك بۇلىب، اونگە حىيا بۇلمەسە،

اوندن ينە تېنگىرى رضا بۇلمەسە،

قىلگىن ايشى شرعى - بجا بۇلمەسە،

اۋزبېك اېمس، اۋزبېك اېمس، ايشانىنگ!

اۋزبېك بۇلىب، بۇلمەسە اجدادى دېك،

كۈنگلى نورگە تۇلمەسە، اجدادى دېك،

حق يۇلى دە اۇلمەسە اجدادى دېك،

اۋزبېك اېمس، اۋزبېك اېمس، ايشانىنگ!

اۋزبېك بۇلىب، قۇللمەسە بىر - بىرىن،

يخشى يۇلگە يۇللمەسە بىر - بىرىن،

قۇللمەسە، يۇللمەسە، بىر - بىرىن،

اۋزبېك اېمس، اۋزبېك اېمس، ايشانىنگ!

اۋزبېك بۇلىب، يورتىنى اسرالمەسە،

اۋزبېك بۇلىب، حققە قولاغ سالمەسە،

وعظ و اۋگىت، نصيحتنى ألمەسە،

اۋزبېك اېمس، اۋزبېك اېمس، ايشانىنگ!

اۋزبېك بۇلىب، ياوگە بۇينىن خملەسە،

اۋزبېك بۇلىب، ياوچىايىنى دملەسە،

اۋزبېك بۇلىب، خىيتىن كملەسە،

اۋزبېك اېمس، اۋزبېك اېمس، ايشانىنگ!

۵ شنبە. ۲۷. میزان. ۱۳۹۶. ميمنه

اۋزبېك شاعرلىرى واتساپ گروھىدە بۇلگن مشاعرە دن

### اولوسىم!

بوگون خدا دەب، كۈزىنگى اچگىل، كۈپ اوخلەمە گىل، تور، اي اولوسىم!

بابالرىنگ دەپك اۋزىنگى تىك توت، ھەمىشە اېركىن يور، اي اولوسىم!

سېن اېسلە صاحبقران بابانگى، اياققە تور، روھىن ايلە گىل شاد،

يۇلىنى جان و كۈنگىلدن ايزلە كە يخشى دوران سور، اي اولوسىم!

يېدىرمە حقينگى ياوگە اصلا، كورەش ائىب بار ستمگە قرشى،

وطنده يخشى تىزىمنى تدبىر يۇلى بىرلە قور، اي اولوسىم!

قۇل و اياغىنگدن اوز كىشنى، قفسنى سىندىرگىل، اوچ فضا گە،

اچىق ھوادە پرنده لردېك يشب يور اېركىن - خر اي اولوسىم!

نفاق دن واز كېچىب توتىنگ اتحاد يۇلىنى ھەر بىرىنگىز،

يۇقسە اېرسە ياووز - غنىم قىلور ملك بىرلە مالىنگ چور، اي اولوسىم!

دعا قىلور من كە تىنگرى سىزلىرى اسرەسىن آفت و بلادن،

كېلە جگىنگىزنى پارلاق اېتسىن، اېتگىنگىز پردر، اي اولوسىم!

شنبە - ۲۶ - سنبەلە - ۱۴۰۱ - خواجه سبزپوش

### تۇرتلیک

تون - کون اۇتهدى دريغ! بختيم ياتهدى، هم قاره بولوت کيپنیده آييم ياتهدى.

کۇريب يامان احواليني اوز بختيم نينگ، اويلب قالمه من و ايس و انگيم قاتهدى.

جمعه ۲۴.سرطان. ۱۴۰۱ ميمنه

### تۇرتلیک

سېن حُسن و لقا ده بلکه دېنگيز ديرسن! هم ناز و ادا ده بلکه دېنگيز ديرسن!

شو آرگينه جبرينگنى اگر ترک اېتسنگ، هم مهر و وفا ده بلکه دېنگيز دير سن!

جمعه ۲۴.سرطان. ۱۴۰۱ ميمنه

### تۇرتلیک

ياريم سري، مېن، سفر قيله قۇشيق اۇقيب، سېوگيمدن اېليم خبر قيله قۇشيق اۇقيب.

گر سېومهسه هم مېنى او بغرى قره تاش، عالمگه اۇزيم سمر قيله قۇشيق اۇقيب.

جمعه ۲۴.سرطان. ۱۴۰۱ ميمنه

### اۇلچاوسيز جفا

بو اولکهده هر لحظه الم - غم ياغهدى، کۇنگيل نى ياريب راکت و اوق، بيم ياغهدى.

بېچاره و دربدر اولوس اوستىگه، اهل! ظلم و ستم و جفا بې اۇلچم ياغهدى.

يکشنبه اقشام ۲۶ حوت ۱۳۹۷ ميمنه

## سېۋىگى اپبارى

بىلمەم كە بو اولكەدن قچان قىغو قاچر؟ بىلمەم كە قچان بو اپل گە خۇشلىك يوز آچر؟

كۈنگىللىرىمىز بۇلىب كدورت دن آق، بىلمەم كە قچان سـېۋىگى اپبارىنى ساچر؟

دوشنبە تانگ ۲۷ حوت ۱۳۹۷ ميمنه

## تۇرتلىك

اولكەم نى بو اوضاعده كۇرىب غم يوتەمن، اۋپكەم نى ابزىب ناله و ماتم توتەمن.

لطف ابله اۋزىنگ حالىمىزگە قادر اېگەم! لطف وكرمىنگنى هر كېز- هر آن كوتەمن.

۵شنبه / ۱۳ / سرطان / ۱۳۹۸ ميمنه

## تۇرتلىك

چوكرى دېسم اغزىنگده سووینگ تورمس هميش، هم اۋزدن اۋزىنگ، اۋزىنگله قىلگىنگ مىش - مىش.

شۇرتنگلىگى دن خۇشىنگ كېلىشىن بىله من، تاپىلسە يېگەي سـن كوز و كۆكلم - ياز و قىش.

سە شنبه / ۲۷ / ثور / ۱۳۹۶ ميمنه

## يمانلىق

هر كېم كە يمان بۇلسە قالر اتى يمان، اۋچمس اتى دن قنچە هم اوتگنده زمان

سېن قويدەگى مثال نى اۋقىب قياس اېت: فرعون و ابو جهل و قارون بىرلە هامان.

۲۷ - ۱۲ - ۱۳۹۱

### اي بىندە!

يوز شکر خدا گە کيىم اپرورمن بىندە، ايتەي اۋزىگە ثنا تا روح بار تىندە.  
مېن گرچە ھىمىشە ايلە ديم جرم وگناھ، بىر يۈل مېنى قوولەمس دېبان شرمىندە.

۲۱=۱۲=۱۳۹۳

### تۈرتلىك

ھىيت كوني ھم كۈيمەدى كۈنگىلىنگ مېن گە، اي كۈنگىلى قرا تاش! نيمە دېيەي سېن گە؟  
گر تاپسە دوام ايشلرلىنگ اي گل شونقە! واي مېن گە و واي مېن گە و واي مېن گە.

۲۴ - سىنبە - ۹۵ خواجه سىزپوش - ھىيت كوني

### تۈرتلىك

ھىيت كوني يار يوزلرلىنى غازەلەدى، دل دردىنى كۈپ قىلىق قىلىپ تازەلەدى.  
گپ قۇشگن اېدىم، يانى دە قىزلر بار اوچون، اوشبو غـرىب و فقيرى دن تازەلەدى.

۲۲ - سىنبە - ۹۵ خواجه سىزپوش - ھىيت كىچە

### تۈرتلىك

قار دېك، گۈزەلېمنى مېرى ساووق بىلە من، غملىرىنى يوتىپ فراقى دە دل تىلە من.  
بىر يۈل مېنى سۈرمەگەي قلەي دېب حالىنگ، دل تاشلىگى دن بو دم شكايىت قىلە من.

۵ شىنبە / ۹ / ۴ / ۹۵ مېمنە

### تۇر تلىك

چېچك اۋتەدى ھم چېچكستان اۋتەدى، كۈكلم - ياز و كوز بىرلە زمستان اۋتەدى.  
بو خستەنىنگ سېوگىسىن غنىمت بىلگىن، بۇى - بستىنگ ايلە زلف پرىشان اۋتەدى.

۲۲ - سنبلە - ۹۵ خواجه سبزيوش - ھىيت كىچە

### تۇر تلىك

مېن غمگە چۇمىلىسم ھم ھىيت اۋتېب كېتر، سېن خۇشلىق ارا دە قالىب كېتسنگ ھم اكر.  
كېل بىردىمى سېونىب حىيات كېچىرەلىك، قىل گپنى، ھمىشە بۇلمەگىن سرکش - اۋجر.

۲۲ - سنبلە - ۹۵ خواجه سبزيوش - ھىيت كىچە

### كۈيدى يورەك

دېوانە بۇلىب بىتتە نى تا سۇيدى يورەك. غم دن اۋشە وقت دن بېرى آه تۇيدى يورەك.  
گورگور يانبيان فرقتى نىنگ حسرتى دە، وه كۇيدى يورەك، كۇيدى يورەك، كۇيدى يورەك.

۱ شنبه. ۱۷. دلو. ۱۳۹۵ ميمنه.

### تۇر تلىك

تېنگرىم! بو اولوس المگە تاكى دىر اسير؟ ھم ظلم و جفا - ستمگە تاكى دىر اسير؟  
بىر نېچە يلايى ھمدە يلتاق قولى دە، الداق و فريب و چمگە تاكى دىر اسير؟

۴ شنبه. ۱۸. حوت. ۹۵. ميمنه

### تۈر تلىك

تېنگرىم! بو وطن بۇلرمى آباد يا يۇق؟  
اېل و اولوسى بۇلرمى دلشاد يا يۇق؟  
سېوگى و محبت له بۇلىب دللر انيس،  
بو قىغو - الم بۇلرمى برباد يا يۇق؟

۴شنبه. ۱۸. حوت. ۹۵. ميمنه

### تۈر تلىك

اېلىم! يمان حالينگ گە قرەب آه اورە من،  
هه! آه جگر سۇز ايله ماتم قورە من.  
مېن سېنگە اصیل بالهليگيم ثابت اېتىب،  
تا بۇلسە کوچيم يايونگگە قرشى تورە من.

۴شنبه. ۱۸. حوت. ۹۵. ميمنه

### تۈر تلىك

اولكەم نى بوزيب كېتاتدى بىر نېچە يلم،  
اۈپكەم نى اوزيب كېتاتدى بىر نېچە يلم.  
اېلىم نى الم نينگ اېلگيدە توتقىن اېتىب،  
اۈزىنى توزيب كېتاتدى بىر نېچە يلم.

۴شنبه. ۱۸. حوت. ۹۵. ميمنه

### تۈر تلىك

تاكى گۈزەلېم كۈزېمنى نَم نَم قىلگەي؟  
فرقت يوكى دن بېلىمىنى هم خم قىلگەي؟  
بېرسين دە جواب او سېوگىلېم، لطفى بيله:  
تاكى وفا - مېرىنى بيزە كم قىلگەي؟

۳ شنبه ۲۵ - ميزان - ۱۳۹۶ ميمنه

## يارب!

يارب! يارب! يازىق - خىطالار قىلدىم،  
اۋزىم گە اۋزىم، عجب جـفـالـر قىلدىم.  
امرىنگە سىنىقىيان باشىم نى اېگمەى،  
حىفا! كە ھمىشە ناروالر قىلدىم.

جمعه / ۴ / جوزا / ۱۳۹۷ / ميمنه

## ھىيت كېچەسى...

ھىيت كېچەسى خىيالى بىرلە ياتە من،  
اھسىم گە آلىب اونىنگ شىرىن سۆزلىشىنى،  
حسرت بىلە قىفو دېنگىزى گە باتە من.  
مىلتىغ تىغى دېك ھوشىمنى اول يان آتە من.

۳شنبە كېچە / ۳۰ / اسد / ۱۳۹۷ / خواجە سبزو ش / قربان بىرە مى نىنگ بىرىنچى سى

## كوز فصلى

كوز فصلى كىبى بۇلدى يوزىم رنگى سارىغ،  
تېلفون سىمى دېك بۇلدى بو گودەم ھم اريغ،  
بىر مرتە مېنىنگ سۇرمەدى حالىم نى او گل،  
اې وای درىغ! وای درىغ! وای درىغ!

۱۲-۱۲-۱۳۹۷ ميمنه

## غربت آفتى

توشتى غربت آفتى باشىمگە آه!  
قۇشتى آغو نى فلک، آشىمگە آه!  
كېچە - كوندوز يىغلەدىم بغرىم ايزىب،  
باقمەدى يارىم بو كۈز ياشىمگە آه!

۳ شنبه / ۱۵ / عقرب / ۱۳۹۷ ميمنه

### بىر پىرى

بىر قرەب صىرىم نى آلدى بىر پىرى،  
كۈنگىمە اۋتلرنى سالدى بىر پىرى.  
باشىمە كېلگۈنچە تا اوچگن ھوشىم،  
لحظەدە كۈزدن يوقالدى بىر پىرى.

۱۳-۱۳۹۷ مېمنە

### الوداع

اې صىمى يار و اورتاغ الوداع!  
بۇلدى دللر داغ اوزە داغ، الوداع،  
اېندى كېتدىك بىر - بىراودن ايرىلىب،  
برچە نى توتسىن خد، ساغ، الوداع.

جمعه. ۱۶. قوس. ۹۷. مېمنە

### الوداع سۇزى

الوداع سۇزى عجب آغير اېرور،  
الوداع سۇزى عجب آغير اېرور،  
الوداع كۈزلرنى ياش گە تۇلدېرر  
الوداع رۇزى عجب آغير اېرور.

جمعه. ۱۶. قوس. ۹۷. مېمنە

### بىت

كۈزىنگ نى قىمتىشىنگگە ايكى علت دن بىرى بۇلگەى،  
بىرى: يا مېنى سېوگى سن و يا اوستىم گە كولگەى سن.

## فرد

تۇرتتە يىلتاق و يىلم نىنگ اېلگى دن بېچاره اېل،

در بدر، نالان و سرسان همده بۇلگن دىر تباہ.

۴ شنبه ۲۶. میزان. ۹۶ ميمنه

## بيت

قاره كۇزى دېك قرا اېرکن مېنينگ بختيم نېتەي؟

بو قرا كۇز، بو قرا بخت اېلگى دن قەي گە كېتەي؟

۳ شنبه . میزان. ۹۶ ميمنه

## تون آيى

بىرلحظه مېنى غمدين ايورگيل.

ترک جفا قيل، يانيمده تورگيل.

كۇزلرنى سوزگيل، لبلرنى بورگيل.

يخشى قيليق قيل، يخشى گپورگيل.

سېوگيم خضر دېك دنيا ده يورگيل.

ايلب ترحـمـ حالينى سۇرگيل.

اې تون نىنگ آيى! حاليمنى سۇرگيل،

كۇنگلينگده جاي بېر، مهر و محبت،

ناز ايله گيل ناز، اې يار هـمـراز،

كۇنگيل نى تيرنر سـؤـزنى اونوتيب،

نفرتنى تشله، الـفـت نى اوشله،

شيدا بېگ اۋغلى عشقینگده كۇيدى،

۲۱ شنبه. ۲۱. قوس. ۱۳۹۱ خواجه سبزپوش